

8

CHINESE-JAPANESE COLLECTION  
HARVARD COLLEGE LIBRARY  
FROM HARVARD-YENCHING INSTITUTE  
JAN 30 1984

T 5222 / 2362



以攝茂才以詩見訪  
物春仲美至自鄂觴之

甌龔洞藁詩集目錄

卷之三

五言律詩

雨中園居四首

北園酌茂承

夏夜同丁元甫王行甫胡茂承方仲美湖上泛

月

李鄭二少叅見訪北園

留飲竟日酒間賦二詩

晚過排市

焦灘舟中獨酌

西禪方丈留題

陳良孺茂才以詩見訪

因贈

初春仲美至自郢觴之

北園

答黃州鄒使君二首

過行甫柯山園四首

雨中渡江酌行甫仲美

望寒谿寺

舟次蘄春避暑法勝寺

顧大參子承按察子良董司理友仲易州牧

子田攜具見訪

過龍眼磯

羅敬叔見過二首

北園酌楊伯海

送伯海東歸

乘上人過訪蓮花菴索

贈

王行甫再過北園

行甫同楊伯海陳良儒見過大雅堂賞菊

富口江岸與行甫及諸親舊席地翫月痛飲成

詩

初冬借王行甫黃子登

莊則大涉江遊陽城洞四首

舟還富口卽事贈子登則大

武昌黃茂才以仁過訪索題其書室

雪夜莊則勸張子元過飲

蘄春江上謁禹廟 再過行甫園四首

舟中酌丘謙之

漢口卽事

漢口進舟遇六十初度寄內

由漢口入郢雜詠七首

楊仁甫招宴文選樓

夜從侯欽之憲使過飲

唐相張柬之園對 黃巖宮三首

雨中過陳繼懷園亭留題

寄題程汝正丹山別業

顧子承先生枉過園居即事四首

夏日黃山人孔昭過訪

答熊長公見懷 送張禹卿

李劉二山人枉過園居

贈李生 聞故人沈純甫復官志

喜二首 宿瞿伯明新居留贈二

首

答熊惟遠問詩 泊湓城

荻港舟夜與仲美醉月

過采石與仲美小飲 江行望行甫不至

喜行甫追至金陵 穆廟改元追錄先生遺

忠教有司為起塚而贈之官賜之祭且錄廕

其後則忠裕已能拜 命矣今先生下世垂

三十年余偶遇忠裕白下愴然思舊情見乎

辭 周達之文學見訪舟中

夜談 飲姚伯道白雪齋

登姚叔度玄覽閣留題

周叔宗與其弟季華自吳江追送至吳門留別  
五言排律

燕臺秋思四首

香山寺

流河驛晚眺

臨清別莫戶曹子明

周先生八十受封于京其子濟叔比部索贈言  
舟中自述留別惟敬子與二十六韻

題岳戶曹署中竹軒同畢廷鳴憲副徐子與郎

中分韻

楊得之僉憲六十

詠竹巖贈大廷尉王子孝

遊鳳樓洞十八韻

休沐苦熱雷雨驟至偶成

悼焚書有序

爲羅丈人詠畫行

吉州別羅國華方伯二十二韻有引

得徐明叔方伯書兼示楚遊諸稿喜而有寄二

十韻

送陳以清進士尹海寧十

六韻

余以初春抵大梁未數日

卽同徐行父憲使巡行諸郡邑比還邸中則

秋矣爰賦一詩紀事得二十六韻

閏八月十五夜同楊使君張別駕湖上泛舟

周大夫八十

莊克成山人七十

再遊虎丘同周公瑕王承父曹子念方仲美張  
左虞羅伯符賦得山字凡八韻

同年錢惟重招遊寒山寺同顧栗如張幼于賦  
得邀字 周公瑕七十

周伯從邀過秦氏園同諸詞客席上賦

郭大司馬君賓出郭見訪邀宴佑聖觀席間賦

贈 方子及李于田招遊天界

寺同楨伯諸君分得青字

時雨篇爲張使君叔見賦有序

喜莊則勸應貢因贈

### 七言律詩

河北道中

退朝逢徐子與宗子相

與之論詩作

寄懷兩兄

高伯宗徐子與魏順甫宗子相見過同元乘小

集分得春字

邊警

庚戌秋日紀事二首

家至

賦得雙塔寺

送梁公實謝病歸南海

登毘盧閣

香山最高亭有懷于鱗

子與

送孫侍御明德按秦中

舟夜懷子與

張良廟

寄薛思素比部

同元美登蕪城閣得秋

字

瓜洲阻風望金焦山

姑蘇懷古

虎丘寺同彭孔加王敬

元美登覽二首

虎丘別孔加敬美

次嘉興卽事

八月十八日浙江樓觀

潮

重遊西湖

夜泊星渚有作簡劉汝欽使君

夜遊鳳棲洞

登黃鶴樓

席上奉酬朱宗伯

舟次赤壁別家兄

過順德飲李于鱗郡齋得難字

寄熊元乘

奉寄二叔明府

送熊進士履道赴新會令

東謝茂秦

送屠侍御宗豫赴金陵

余德甫席上餞別子與同茂秦元美賦得開字

送蔡憲使子木還任蜀中

聞吳中寇亂寄訊徐明叔司勳張子培明府

送李侍御于翔按雲中

省中曉直

送劉子成兵備黔陽

送田戶曹子仁赴潯陽榷稅

寄上少司馬王公時總戎代郡奏捷



問劉方回病

歲暮懷李于鱗

懷梁公實

懷宗子相

歲暮示元美

元日早朝

送劉方回武庫還楚

七夕張肖甫至同諸子

邀集旅舍

徐明叔至自吳

子相元美過訪

秋夕齋居示子相元美

與子相對月得人字

奉寄明府二叔

子與至同子相元美夜集得着字

送王元治秀才歸吳門

甌甌洞藁詩集三卷目錄終

甌甌洞藁詩集卷之三

武昌吳國倫著

始安張鳴鳳校

哈佛大學漢和  
圖書館珍藏印

五言律詩一百一十九

雨中園居四首

長日閉巖扉無管久息機  
雨來滋石蘚風起亂山衣  
古柏干霄立閒雲掠水飛  
抱書眠正穩何事與心違

其二

一夜滄浪水平吞下雉  
湖洪波浮睥睨急雨蕩菰蒲  
負缶肩初息垂綸興不孤  
盤中但鮭菜甘與酒為徒

其三

隴上雨差足莫愁三逕荒魚乘新漲躍鳥避疾風藏  
花落不成錦竹鳴如鼓簧却驚圖畫裏新結輞川莊

其四

宿靄迷山徑懸泉響石池踈荷青歷亂茂樹綠參差  
暫阻攜壺客聊親抱甕兒日長從起臥蘋末動涼颼

北園酌茂承

五年三見訪千里一知音末路誰風雅交情自古今  
竹間雲作臥池上石爲林多少留君意松醪款自斟

夏夜同丁元甫王行甫胡茂承方仲美湖上泛

月

泛泛平湖月鳧鷗總不猜遶城千樹盡迎艇萬峯來  
空際發簫管鏡中行酒杯清光戀佳客深夜此徘徊

李鄭二少參見訪北園留飲竟日酒間賦二詩

爲有園居癖無營日掩關那知金紫客亦到薜蘿間  
旋覓村中酒同看竹外山坐深涼意足石隙瀉潺湲

其二

不憚郊行遠衝炎竝馬來入門先脫帽隨石坐銜杯  
竹里幽人社蘭亭異代才酣眠綠陰裏簫鼓莫相催

晚過排市

絕岸遙相距中流迴自寬鳥歸山市暝楓落水村寒

玩世曾棋局藏身只釣竿孤舟天地外雲石總奇觀  
焦灘舟中獨酌

席掛千峯過灘懸二水分蓬間下木葉几上結秋雲  
自信漁樵侶堪同鷗鷺羣呼兒將濁酒淺酌送斜曛

西禪方丈留題

密樹隱禪關疎鐘出亂山徑隨龍藏遶泉作虎溪灣  
夜伴空王卧朝留半偈還前身都莫問駒隙過人間

陳良孺茂才以詩見訪因贈

之子正英妙遠遊何愛勞涉江心獨苦哀郢曲彌高  
叩我來空谷論文進濁醪相將橫羽翼那得久蓬蒿

初春仲美至自郢觴之北園

白雪久無和君今郢上來春盤聊藉石露冕一登臺  
屐滑縈新蘚杯香泛落梅清歌遶林麓雲物與徘徊

答黃州鄒使君二首

雨壑來單騎雲林到遠書清風在江漢佳句總璠璵  
佩擬秋蘭結金分月俸餘盈盈一水隔相望欲何如

其二

驚聞辭漢署臥治楚黃州郡事山雲見時情漢水流  
名高舊題柱興至一登樓卻有巖棲子知君似隱侯

過行甫柯山園四首

買舟三百里江上見柯山古徑雙橋外方塘萬木間  
入門花石喜留客水雲間若與王猷共山陰那得還  
其二

性癖耽幽勝風雲奈汝何寄情都不淺乘興一相過  
宛轉看亭榭陰森坐薜蘿移樽從所適山鳥自爲歌  
其三

藜簞開作徑灌木不知年未解亭相錯翻疑地屢遷  
烹葵支舊鼎種樹續新編總失干時計端居亦晏然  
其四

散步出幽籬羣芳送酒卮隔城巖漏下近寺暝鐘遲

秉燭雲生榻停歌月滿池不禁酣欲臥敢謂老能詩  
雨中渡江酌行甫仲美

一葉看山棹凌晨破浪開煙橫極浦暗雨挾萬峯摧  
鷗鷺棲樊口蛟龍撼鄂臺中流不知險與客劇銜杯  
望寒谿寺

不見寒谿寺惟聞谿水流入江渾是雪帶雨忽成秋  
海國文殊像禪林浪士遊樊山最高處騁望白雲愁  
志稱陶桓公得文殊銅像於海上送之寒谿寺

舟次蘄春避暑法勝寺顧大叅子承按察子良  
董司理友仲易州牧子田攜具見訪

梵宇千門遶僧房一鑑幽艇分蓮葉出軒抱水雲流  
凝結逃禪會何當載酒遊卻疑陶令醉三笑虎谿頭

過龍眼磯

在蘄州江心

片石亂流中巋然抗佛宮諸天龍樹表萬象蜃樓空  
花雨都成雪濤驚不為風孤僧容膝處應與海門通

羅敬叔見過二首

落落南州士行歌信遠遊相將窮海嶽亦復叩林丘  
黃鵠思高舉明珠忌闇投幾年懷一刺而我愧名流

其二

豫章舊遊地諸子解言詩古意紛相命新聲久漸移

得君何大晚顧我若為私攜手當搖落翻增楚客悲

北園酌楊伯海

新知情不淺小飲興偏長學圃藏吾拙看山藉汝狂  
毫端開五嶽句裏激三湘蕭瑟東籬菊還堪日舉觴

送伯海東歸

汝泛東歸棹夷猶雉水濱不堪搖落思又向遠遊人  
彩筆應忘老青山只助貧江門千里月相望獨傷神

乘上人過訪蓮華菴索贈

老衲浮江至還如認鉢年抱經燃綠桂說法吐青蓮  
借宿雲林下真空水月前孤踪渾不定隨處有人天

王行甫再過北園

短檝犯江濤頻過不厭勞知君重然諾念我在蓬蒿  
對菊詩偏美看山飲獨豪相將乘野興攜手遍蘭皋  
行甫同楊伯海陳良孺見過大雅堂賞菊

草堂惟有菊萬朵不勝寒只好徵君醉寧供賦客餐  
暗香浮入酒野色豔垂冠奄忽秋期逝當歌且盡歡  
富口江岸與行甫及諸親舊席地翫月痛飲成

詩

落日停孤棹親朋載酒過沙頭披野服浦口發漁歌  
晚霽霜華薄天空月色多隔江山不斷飛影障洪波

初冬偕王行甫黃子登莊則大涉江遊陽城洞

四首

鼓舵涉江去江干日正晴會心多石色浣耳是泉聲  
竹外水煙靜雲中雞犬鳴飄然躡飛蹬山鬼莫相驚

其二

一徑穿田入雙湖夾隴開山迴儼城郭雲起即樓臺  
好結漁樵侶無妨鹿豕猜洞門欹片石聊復坐銜杯

其三

靈竅幾時闢奇遊我輩先乍窺疑海市深入又壺天  
丹府雲霞異青城日月偏已於人境絕不必更逢仙

其四

雪溜穿層峽霜藤垂古崖雲從衣袂出石似水宮排  
隱約藏金檢熹微見玉階龍湫深不極時自吐陰霾  
舟還富口即事贈子登則大

一水通靈境招遊興不違浪驅雲氣盡帆背夕陽飛  
近磧喧漁唱臨流振客衣詩成留二妙何異舞雩歸  
武昌黃茂才以仁過訪索題其書室

負郭齋新闢穿雲徑始通江聲迴鄂渚竹色隱吳宮  
問業吾何有論文汝自工今看下帷處還與董生同  
雪夜莊則勸張子元過飲

小盡寒初厲樽開客正過雪華山郡蒲夜色草堂多  
狎語銷岑寂深杯慰輶軻綵袍猶自薄將謂故人何

蕪春江上謁禹廟

山遶鴻沙曲城憑鳳嶺孤古祠銜絕磴飛浪灑平蕪  
萬里來江漢千門過舳艫可知神禹蹟浩蕩古來無

再過行甫園四首

野色春初換山行客又來僕夫諳舊徑童子進新醅  
一榻仍依竹重林只放梅深杯趨自勸不為管弦催

其二

率爾過吾子依然面此君塢藏經歲雪樓瞰隔江雲

木石都含意親朋盡好文交歡殊不厭酪酏臥斜曛  
其三

藁樾相虧蔽山亭自鬱盤鳥忻新雨霽花怯早春寒  
積蘚支芒躋飛藤挂籜冠總無浮世景何減昔時看

其四

忽訝林亭改由來木葉稀縱歌憑水榭散步入煙扉  
令我經時戀宜君與世違細看蘿薜外何事不成非  
舟中酌丘謙之

野色上微服春風吹野航滄江一握手明月劇傳觴  
舊事浮雲盡新詩末路強憐予已衰白歌發尚能狂

漢口卽事

江吞千折水堤遶萬家村蔽岸停商舶爭途入市門  
北風湍溜急斜日井煙昏十五當壚女新裁犢鼻褌  
漢口進舟遇六十初度寄內

江行曾幾日旅泊又流年老態欣無恙浮蹤信所便  
旋呼生日酒重著遠遊篇寄語閨中婦風波倘見憐  
由漢口入郢雜詠七首

漢水幾千曲飛流自隴西到來雲夢闊翻覺楚天低  
積潦平江縣垂楊匝古堤踏春遊女出彷彿浣紗溪  
其二



雪浪高湏口津途日以遙牽江無錦纜擊汰有蘭橈  
岸岸春培柳家家夜緯蕭不須妨物色吾已混漁樵

其三

反照江村暮漁人別浦還負舟藏屋裏收網掛林間  
有客旋沽酒無營自掩關何曾識城郭只共野鷗閒

其四

村女無膏沐劬勩攬褐衣侵晨提甕出薄暮刺船歸  
網得江魚美持襤隴麥肥時平生計足夫子願無違

其五

行遊良自適况復美人俱日傍水雲醉那知江路紆

堤青舒苑柳野綠散蘼蕪望嶽仍千里長吟且共娛

其六

散步江干好胡牀坐亦舒憐人最春色適意總吾廬  
薜荔全遮屋鷓鴣巧趁魚芳洲美蘭杜采采動盈裾

其七

前山雨忽霽春色竟陵多古樹蒙丹壑平沙上白波  
却醒神女夢來聽郢人歌風物應留賞飛帆莫漫過

楊仁甫招宴文選樓

風流蕭太子結客此論文重鎮仍南土高齋空白雲  
坐中三峴出天際一江分佳會不深飲將無負使君

夜從侯欽之憲使過飲唐相張柬之園

登高有餘興扶醉入平林  
露柏移燈緩煙蘿布席深  
烏棲唐相宅石泐漢江潯  
勿復嗟興廢須臾是古今

南巖宮三首

回看金碧色隱約斷巖中  
樹杪飛雙闕雲間挂六宮  
至人棲廣漠大道在崆峒  
玉檢先朝閱祥光自鬱蔥

蔥

其二

循崖俱斗折度隴忽雲蟠  
石捧元君殿霞封太乙壇  
萬杉蒼靄合千澗碧流寒  
多少仙人迹扶筇面面看

其三

薄暮山仍雪凌晨景忽空凍  
雲迷虎澗積葢覆龍宮  
景物行俱幻玄真悟總同  
何當此冲舉萬里御天風  
雨中過陳繼懷園亭留題

築圃纔盈畝分畦自一區  
雨增苔石媚煙裊竹垣迂  
拂檻鳴青玉披藜散綠珠  
移樽覓幽賞豈復畏沾濡  
寄題程汝正丹山別業

見道新營圃蕭疎一水村  
峯陰移白嶽瓜種乞青門  
掃石雲生榻穿林雪滿樽  
閒居足幽意何減在崑崙  
顧子承先生枉過園居卽事四首

十年三訪戴今始不迴舟先生嘗再入下雒湖並以風逆反掉故云漲湧  
谿流穩春深野樹稠暝煙侵石戶纖月起山樓靜聽  
玄家語真從世外求

其二

江鄉推大老今古臥龍名屢謝玄纁聘偏深綠綺情  
看山聊木榻佐酒只尊羹向夕聞黃鳥慙予亦友生

其三

豈意幽人巷仍停長者車高風存古昔雅道屬樵漁  
瀑掛山梁迴煙縈水檻虛從君操几杖何地不蘧蘧

其四

寒蘭杜因之造薜蘿萬山銜雨過百里聚星多  
霞外赤松侶酒邊青桂歌風泉落幽磻不減奏雲和

夏日黃山人孔昭過訪

長日惟高枕那知叔度來綠雲生野服脩竹引深杯  
却訝年俱叔山人與予年俱六十猶慚賦異才清秋良可待三  
逕且徘徊

答熊長公見懷

江上傳佳句山中暑乍收萬家方閔旱一字迴迎秋  
短髮勞相憶明珠愧未酬此時鱸正美何得奉清遊

送張禹卿

君行何落落秋色滿蒹葭  
逆旅看浮世詞才屬故家  
且乘涼夜月一醉石林花  
明發孤帆影江樓望漸賒  
李劉二山人枉過園居

自愛巖居僻秋深二客來  
涉江詞竝美過剡興難迴  
且狎青山醉都忘白髮催  
爲憐佳會少乘月更登臺  
贈李生

盱江曾立馬不及叩斯人  
何意幽棲處飄然遠見親  
月中花似雪杯裏髮如銀  
未復傷遲暮遨遊興正新  
聞故人沈純甫復官志喜二首

微官不解事一語欲回天  
死訣投荒地生餘謁帝

年仙班誰舊侶優 詔只名賢直道無  
今古賈生還席前

其二

去國關何事還朝此一時  
天心存骨鯁吾道起鴟夷  
瘴癘身差健冠裳夢亦疑  
向來梅福疏曾恨徒薪遲  
宿瞿伯明新居留贈二首

萬井羅江市君家却面山  
徑穿池樹僻堂抱野雲間  
與客看垂釣邀僧學閉關  
偶乘幽興入高枕聽潺湲  
其二

屋角高江沸庭心大嶺橫  
漁樵安素業杯酒話間情

委巷車塵絕寒空雪意生不妨經再宿與結布衣盟  
答熊惟遠問詩

學古虛稱老譚詩却未工汝今懷壯志猶可激頽風  
郢客歌誰和湘靈曲易終未須憂失鵠巧力在調弓

泊湓城

帆落潯陽渚山川是舊遊峯雲仍九疊江色自孤舟  
湍急漁人狎津重賈客愁銜杯忽自笑不及浪中鷗

荻港舟夜與仲美醉月

夾水千家市晴沙護楫圻賈檣依露渚漁火出煙扉  
片月迎潮上驚鳥遶樹飛深杯夜欲旦猶自戀蒲輝

過采石與仲美小飲

何處然犀浦飄飄采石東春蘋依渚亂午浪觸山空  
指點虛陳迹登臨自古風猶憐宮錦泛不與布衣同

江行望行甫不至

東遊興已發西望不勝情問酒誰為侶看山夙有盟  
徘徊湓浦岸忽漫石頭城何事王猷棹猶然滯水程

喜行甫追至金陵

待汝新林浦江花忍自看俄然飛席至便作倒樽歡  
賦草克行筇煙波狎釣竿方舟遲明發隨地采芳蘭

穆廟改元追錄先生遺忠敕有司為起塚而贈

之官賜之祭且錄廕其後則忠裕已能拜  
命矣今先生下世垂三十年余偶遇忠裕白  
下愴然思舊情見乎辭

先朝楊給事死諫亦逢干赤日心爭烈黃沙骨已寒  
詔書俄起冢冥錄漫彈冠孤憤留青史乾坤萬古看  
周達之文學見訪舟中夜談

有美東南士浮槎遠見過五湖傾蓋晚一日飲醇多  
古色蒼龍劍新聲白苧歌交歡夜垂午攜手視明河  
飲姚伯道白雪齋

秋意營清室留賓罄所歡圖書開靜几竹石蔭踈闌

酒釀茗谿綠歌調郢雪寒新知有如此那得不盤桓  
登姚叔度玄覽閣留題

美人能習靜築閣小堂西案貯窪樽石軒憑罨畫谿  
春山雲氣合芳樹井煙齊客至耽清賞都忘白日低  
周叔宗與其弟季華自吳江追送至吳門留別  
江東舊家子雙玉挺清標問字交非淺移樽送獨遙  
綢繆將解佩信宿且停橈茂苑看花落酣歌興轉饒  
五言排律

燕臺秋思四首

戍角晚來頻客愁秋更新食魚思故國捫虱向時人

唐垂淵堂  
言集卷三  
十四  
吏有莊生傲家徒原憲貧邊烽常墮淚岐路敢謀身  
計失虛焚草時危已積薪飯牛歌白石驅馬走黃塵  
碌碌終何事乾坤自隱淪

其二

帝城寒色動仙掌露華甘白馬盟猶在黃龍戰未酣  
材官守薊北使者下江南賈傅空長息嵇生故不堪  
側身聊自託揮塵向誰談俠氣青萍劍愁心碧玉簪  
文章如不朽汨沒復何慙

其三

樗散已成習逢迎真厭勞泥途甘曳尾塵世且持螯

白眼從相視玄心信所遭風塵淹墨綬歲月負鈇刀  
秋思隣砧急鄉書海鴈高百年期鮑子孤憤謝山濤  
坐感羣芳歇悠然憶楚臯

其四

燕臺臨易水登望欲銷魂九陌秋陰澹諸陵日氣昏  
香山寺

不盡登臨興其如搖落何香臺凌縹緲紺殿鬱嵯峩  
古壁璇題蝕先朝翠輦過雲深龍藏杳地迴鷺峯羅  
塔勢飛金掌林聲散玉珂山腰垂列磴樹杪出盤渦  
北極開天府西湖引御河簷巢窺法鳥堂狎聽經鸞

寶座珊瑚蓋祇園雨露柯披煙探舍利拂石誦維摩  
日落仍聞梵風高獨放歌明朝入城郭何處了諸魔

流河驛晚眺

日落江光隱沙寒雨氣侵長天送遠目去鳥促歸心  
楓葉早霜下芙蓉秋水深賈帆飛樹杪漁網集亭陰  
鷗狎中流棹鷓棲隔浦林涼飈起高樹一爲爽煩襟

臨清別莫戶曹子明

多病似相如扁舟歸故廬嶽雲生縹緲海色播空虚  
下榻憐知己開樽慰索居儒臣憂國計王者念軍  
儲涕淚燈前酒烽煙別後書相逢非汗漫執手更躊

躇

周先生八十受封于京其子濟叔北部索贈言

詔起吳門隱名題漢署通九苞岐鳳瑞千里渥駒雄  
侍從星辰切瞻依雨露同素封移橘柚華髮向鷓鴻  
酒熟新豐市花明長樂宮恩侔歸尚父榮與載申公  
籍已中朝貴人猶太古風向來鷓冠子老去鹿皮翁  
暫謝漁樵侶非貪羽翼功異時瞻紫氣或在函關東

舟中自述留別惟敬子與二十六韻

何意黃金聘翻成白璧疑辨應窮客難夢已卜吾衰  
赤管風雲妬紅顏雨雪欺死生懸諫草飲啄過憂葵



日月憑孤劍江湖重一麾身從時態側官藉主恩  
 移道路千秋覓行藏二妙知未愁同病少頗怪獨醒  
 遲擊筑燕京散方舟衛水隨相看成羽翼兼得避肝  
 睢才豈應劉忝名非李郭私黃河大地坼秦嶽遠天  
 垂棹屢停沽酒杯深把賦詩遂能驅萬象不獨解羣  
 願禮法何曾設佯狂任所之人間失意事我輩壯遊  
 時倉卒三吳寇縱橫六月師但聞盟白馬那敢咏蒼  
 狸舉火山爭烈奔濤血竝吹世情增扼腕國步在燃  
 眉竊有浮湘興重題哀郢詞星辰猶北極松菊且東  
 籬嶺外歸仍遠江南去漸悲艱難持節使浩蕩及瓜

期後會誰還健浮生各未涯中原烽燧色處處礙和  
 思

題岳戶曹署中竹軒同畢廷鳴憲副徐子與郎

中分韻

何處堪題竹招攜有故人倚雲分鳳翅舍雨坼龍鱗  
 翠灑亭軒滿青翻石壁勻尊疑開少室客似坐湘濱  
 阮氏名空著王猷興頗真無妨在城郭差可避風塵

楊得之僉憲六十

南極星何爛東山臥正高社叢淮海桂溪實武陵桃  
 歲月新扶杖雲霄舊賜袍竹間珠履集花際彩衣勞

壯氣凌長劍孤懷寄濁醪顏非丹藥駐名豈赤松逃  
玄草應誰授倚蘭合自操幾時招鶴馭舒嘯楚江臯  
詠竹巖贈大廷尉王子孝

有美東南節檀藥起粵陬含風吹絕磴衰露灑寒秋  
選地曾千畝憑虛儼十洲籬踈雲母障几靜夜光流  
牖納印王獻林虛洛士游煙霜卷石共律呂上方收  
案帙青猶汗山樽綠自浮請看舜林笈何異傅巖舟

遊鳳棲洞十八韻

莫問秦源僻誰探禹蹟幽山靈開鳳穴礧瀨瀉龍湫  
苑轉青蘿徑空濛白玉樓區中疑乍闕物外此奇搜

牖結千巖霧松吹萬壑秋攬衣晴雪擁捫壁晝星流  
應鼓蟾蜍鬪迎燈罔象愁九莖披赤館一粟啓丹丘  
忽覩朱旗閃旋驚翠幟收珠宮時隱見乳窟半沈浮  
月抱禪林榻沙維陸海舟神鞭驅未息狄掌覆能留  
石匣羣仙秘雲根五色抽坐當鯨甲奮行迫蜃臺遊  
已足超河漢猶妨犯斗牛經過成變幻樽酒恣綢繆  
便欲逃清世無勞羨隱侯凌崖發長嘯天外散鳴璆  
休沐苦熱雷雨驟至偶成

緩帶雲如火扃扉日故紅匡牀聊假寐團扇苦無功  
病益炎蒸助愁兼瘴癘攻相將賦大暑忽爾動雄風

爽氣高齋滿層陰廣漠同虞泉歸赤鳥閭闔隱緋虹  
雨色乾坤暗霆威海嶽空六螭浮蜃閣萬馬蹴龍宮  
潮撼孤城震天鳴百粵通胡然翻屋雷急爲洗山戎  
未暝號魑魅先秋謝祝融絺衣涼漸怯斗劍倚堪雄  
却信湘州燕難傳楚塞鴻陰晴變呼吸何自測神功

悼焚書有序

予宦遊二十年購書近萬卷爲樓貯之甚珍  
每歸輒謝客坐臥其上晏然忘貧卽里中少  
年亦鮮知予貧也頃聞暴客登樓遍探篋笥  
無以當其意乃縱火焚書以去予竊悼焉爲

賦四十韻且以自廣云

萬卷從吾好千金不易裝少年窺橐籥垂老厭圭璋  
散帙高連屋懸籤疊滿牀牛毛原汗漫雞跖亦輝煌  
天啓河圖秘霞生石墨香寄身編竹穩遊思結繩長  
几上赤虹現楹端彩鳳翔秦碑留故蹟汲塚弔餘芳  
露綴三經席星標六藝場百家馮羽翼諸體叶笙簧  
野叟食芝訣園公種樹方靈蛇蟠入次繡虎伏成行  
緝理茅茨閣週遭薜荔墻幔雲飄旖旎簾影動瀟湘  
戶牖都鉛槧山川此棟梁敢同莘野樂羞異竹林狂  
歲月資弦誦精英屬表章王須防散逸誰更卜災祥

宦拙家逾遠時艱力未匡夢魂驚燕雀消息闕豺狼  
舊業干羣象斯文厄九陽鬼神憎篋笥兵燹縱縹緲  
豈復秦時暴無容魯壁藏何曾分玉石渾欲戰玄黃  
井吐商辰色煙昏太乙光總爲蚪蚪崇遂作蝨魚殃  
噀雨遙難制迴風近莫禳熖氛騰赤館烈焰倒青囊  
未乏焦頭客其如白額郎妻孥存鼠竄城郭任鴟張  
誤改于公戶慙非魏士鄉絲桐歸火帝符籙獻空王  
重比周彝徙珍逾孔履亡劫灰期未辨禪電語能詳  
錦目殘烽擲珠函敝帚當輪今悟糟粕角且叩宮商  
却遂吾兒嬾虛增過客傷爲儒甘刺豕託隱慕屠羊

市肆歸堪借言筌靜欲忘有形俱幻化何用熱中腸  
爲羅丈人詠畫竹

白練生煙霧華堂集鳳鸞露梢翻欲滴風籜解仍寒  
未刻羌人笛先懸渭叟竿雲根標突兀石脉蔭檀藥  
大夏圖堪獻清湘枕獨安起持龍作杖投向葛陂看  
吉州別羅國華方伯二十二韻有引

國華以方伯赴山西予以提學赴貴陽約自  
南海發舟度嶺至吉州分路同行凡廿餘日  
遇景登臨呼醪竝賞殊極懽洽悵焉難別詩  
以寄悰

捧檄之官遠方舟上瀨同雲移三島絕潮送五羊東  
浦訝投香晚山知貢羽通踏鼇看貝闕披蜃過珠宮  
錦纜牽危峽金樽盪遠空醉能鞭海石狂欲御天風  
岸盡江仍曲關分嶺獨雄唐祠棲舞鶴漢壘入鳴驄  
咫尺鄉音辨流連勝槩窮南州開二水北斗射孤篷  
漸與波濤狎都無禮法攻彈碁江漠漠醒酒日瞳瞳  
古郭青螺擁晴沙白鷺翀青螺古州山名白鷺洲名念當分兩鷁  
猶復戒雙熊鸚鵡杯重泛驪駒曲未終七盤春瘴外  
三晉成煙中鬼國今重譯扶桑未掛弓籌邊須李牧  
化俗媿文翁旅鬢參差白河花爛熳紅星辰俱劒舄

聚散一萍蓬旗捲千峯雨帆懸百尺虹總難期後會  
消息到秋鴻

得徐明叔方伯書兼示楚遊諸稿喜而有寄二

十韻

僊僕來何遠懷人別巴長關山懸皓首夢寐在滄浪  
名豈三遷重途從九折康十年頻仕楚千古一浮湘  
問俗雄風國徵歌白雪鄉胸中貯雲夢筆底奏宮商  
進艇天移棹登樓月滿牀珮疑交甫拾樂儼洞庭張  
帝女哀應盡靈均怨忽忘衡巫排几席江漢落縹緗  
諸體音宮協殘編野史藏士傳瞻竹詠家誦伐檀章

記好名荆楚書知發酉陽寄愁心脉脉流韻耳洋洋  
只媿非同調猶能識大方絕塵無駿價照夜有珠光  
遙想雙熊遍應如五鳳翔雨雲紛自散蘭杜遠生香  
宦邸開文苑吾廬傍武昌幾時黃鵠渚同醉紫霞觴  
送陳以清進士尹海寧十六韻

以清吾友鳴仲  
子也兄弟八人

君家八才子汝更早知名一顧天機迴孤鶩海翮輕  
青雲無後輩白雪有先聲奏對三千牘輝光十五城  
真能開氣象不獨紹簪纓玉筍趨朝謀符領邑  
行匣龍作劍車揭鷺爲旌澤國稱佳吏明時自臬

爭片雲將舄到萬戶待琴鳴爲覽東南勝應增感慨  
情署鄰鮫室穩閣望蜃樓平木客巢秦莽離郎狎海  
瀛廢書聞夜織露冕閱春耕寒月隨潮上疎鐘入雨  
清放歌回禹穴飛夢遶神京臺省尋常事毋忘倒屣  
迎

余以初春抵大梁未數日即同徐行父憲使巡  
行諸郡邑比還邸中則秋矣爰賦一詩紀事

得二十六韻

何意逢徐孺中原托勝遊光輝延楚壁意氣拭吳鉤  
地迥陰陽合時平帶甲收初花迎攬纒殘雪擁披裘

柳障金堤暗雲連石室幽行春馳馬坂弔古及鴻溝  
二月黃河渡孤帆青翰舟川原開壯麗來徃信綢繆  
封父墟全瘠中郎碣半留論文過菟苑把手間葵丘  
六鷁飛仍退時過宋雙熊役未休纔看謝桃李忽漫  
發葵榴入眼芳華遍驚心大火流夜分便露寢晨起  
迫星郵暑雨疲朱紱塵氛厭白頭偶經陳蔡里更觸  
古今愁望嶽三塗近宣風二潁周簿書存感慨禾黍  
動歌謳鄭圃人安在洪堤術未酬深杯相慰藉款語  
見沈浮倦益梁園病愚分杞國憂每勞虛左席何敢  
望前籌明月懸官署斜陽薄戍樓詩成偏擊節酒罷

復鳴騶只縱登臨興寧知歲序適信陵臺畔草息駕  
已新秋

閏八月十五夜同楊使君張別駕湖上泛舟

山際水新落波間石漸浮月明偏此夕天與閏中秋  
露浥桐陰靜河涵桂影流遡洄經萬木截浦犯羣鷗  
漁火移初岸歸帆度遠洲盤供鱸膾薄席引象樽幽  
二客忘軒蓋孤槎上斗牛酣來但高枕非爲白雲留

周大夫八十

楚甸新秋至君家淑景偏涼飈清小徑晴旭麗長筵  
綠髮壺公喬丹經柱史傳政成三仕後名著一麾前

蜀道何曾險柴桑蚤自全角巾存古意綉帙載新篇  
結社開蘭畹娛賓藉林田鄙人慙共里高義感忘年  
解組如相待比鄰竊有緣朝從鳩杖出暮引鹿車旋  
共訝蟠谿叟還同少室仙羽儀優國禮風節領時賢  
浦桂迎霜茂園椿足雨妍日須拚酪酏常傍彩雲眠  
莊克成山人七十

古之愚也直今也直躬誰獨有蒙莊子能如榮啓期  
家風曾萬石月旦儘羣疑高枕雲林麓垂綸漢水湄  
到門多長者華國定佳兒老去登臨健酬來謔笑奇  
玉光紫鶴髮丹氣鬱龍眉尚擬蟠谿叟還從後載馳

再遊虎丘同周公瑕王承父曹子念方仲美張

左虞羅伯符賦得山字凡八韻

海氣蟠空出峯陰繞郭還古雲霾劔峽新雨霽禪關  
殿閣虛無裏江湖組練間林森雞足樹塔穩鷺頭山  
似有曇花墜俄令法石斑重來諸景幻晏坐六身閒  
問偈都無語當杯且笑顏僧房一借榻支枕聽潺湲  
同年錢惟重招遊寒山寺同顧粟如張幼于賦

得邀字

遲日進蘭橈通川十二橋凱風初夏景清酒故人邀  
野霧都縈樹溪雲欲上潮古墟藏佛刹修竹蔭僧寮



半偈身如寓三天境未遙老龍潛勺水孤鴈泣前朝  
寺在宋朝有塔今廢積蘚侵堦長空花拂案飄逃禪欣有託千  
劫醉中銷

周公瑕七十

爲問天池舜何如地肺芝養生非大藥逃世卽仙姿  
彩筆雲霞吐青藜海嶽支七旬書更著三老詔寧遲  
客獻岡陵頌杯分瓊玉脂逍遙成獨往不必遇安期

周伯從邀過秦氏園同諸詞客席上賦

築圃惠山麓坡陀間野田牖標雙鴈塔池滙九龍泉  
崖木圍蒼靄濃花破綠煙閣虛涵水鏡堦滑上榆錢

小徑冠從側重林履欲穿亭陰松蓋偃峯杪桂輪懸  
宛坐清涼界還疑小有天周郎殊愛客歸舫恣流連

郭大司馬君賓出郭見訪邀宴佑聖觀席間賦

贈

居守街三命行營擁八鷗千旗鍾阜出百將羽林蒐  
列隊臨河曲前驅下石頭傳呼大司馬來叩野人舟  
雨隔烏衣巷沙侵白鷺洲江花繁勝錦海氣鬱爲樓  
偃蹇收殘帙倉皇攬敝裘風塵驚一顧天地失羣愁  
白髮經長別青雲感舊遊素交看欲盡高義若爲酬  
握手新林僻張筵古觀幽回瞻龍虎勝洵美帝王

州羽客鳴朱管庖丁繫綠鞵雕盤何錯落玉罕任沈  
浮地敞宜銷夏涼生更是秋總因陳契闊不覺坐淹  
留改席恣餘興停樽問遠猷十年平嶺海萬里壯歌  
謳已勒旂常績仍懷社稷憂舊京艷鎬重名世呂  
伊儔帷幄今虛席寰區擬借籌元勳終相國不獨漢  
鄼侯

方子及李于田招遊天界寺同楨伯諸君分得

青字

福地璠空界香臺切帝庭寶光三殿紫曇影百林  
古象伏空王座龍歸大士餅旂幢標四極鐘鼓肅羣

靈礪瀑虹橋落江雲鹿苑停到來諸境寂坐使六塵  
醒梵閣支層漢僧寮布列星焚蘭先借榻啜茗坐聽  
經雷雨過蒼麓松杉鬱錦屏且從霞外侶更醉竹間  
亭

時雨篇爲張使君叔見賦有序

往歲六月大旱張使君齋沐徒跣登禮百神  
勞苦祈求凡二十日始得雨農家猶半穫也  
今年四月又旱農且不耕使君憂之益暴其  
身奔走赤日中勞倍往昔凡三日雨響應耕  
矣六月又大旱使君曰耕不有秋猶不耕也

安用司牧爲於是陳辭籲天下令罪已帥父  
老暑行露食勞又數倍於四月始有編民所  
不能堪而士女所不忍見者其情之激則不  
啻側身思過居環艾坐積薪也凡六日一雨  
十日再雨十二日大雨如注原隰霑足予適  
病肺偃臥聞雨聲輒起而農人舉手相賀曰  
茲使君膏澤我而粒我也吾屬老且死未見  
憂民之憂而卒遺之以樂如使君者子能無  
頌聲乎作時雨篇

地道寧相厄天心乍可疑三農占歲日百穀仰膏時

大火流金石甘霖阻夢思星符虛應召月額屢愆期  
遂恐江湖涸深增雲漢悲羣生懸燕麥 國計委鳧  
莖豈有乾封意空聞縮水奇傷心待枯槁束手視流  
離幸爾逢州牧居然邁雨師政平山谷頌操潔鬼神  
知閔旱心先激禳年力鮮遺側身暴原野被髮叩壇  
墳實下憂民淚專陳罪已辭山川回積亢父老歎真  
慈少女風初動豐隆電忽馳立驅妖貉盡行見土龍  
移共迓玄冥馭潛銷赤地危暫來猶霖霖密布已淋  
漓霧壑連輪至風簷瀑布垂野田都滑滑嘉種漸絳  
絳瑞擬銅盤露珍同王鼎脂靈通類桴鼓誠信卽著

龜萬室塵氛淨千山爽氣滋病夫捐藥餌狂客洗樽  
誰  
羹穩藉雞豚足旋供布粟資齊聲歌大有功德自伊

喜莊則勸應貢因贈

何物俱先達而君獨晚成但醒窮路泣無損少年名  
業擅三湘秀恩階一命榮遺珠偏照乘抱璧竟連  
城白首看人盡青袍謁帝行玉墀應奏對彩筆尚  
縱橫九阪神駒步三年大鳥鳴到來欣遇合殊不負  
平生

七言律詩

河北道中

時應試北上

朔風寒擁鷓鴣裘歲晚遙從計吏遊赤縣五雲開北  
極黃河萬里劃中州關山立馬天逾遠雨雪聽鴻夜  
未休大道縱橫車騎客何人先借漢宮籌

退朝逢徐子與宗子相與之論詩作

三月長安花滿城五陵裘馬少年行逡巡東帶趨華  
省寂寞揮毫賦帝京御氣高從三殿合香煙細結  
五雲生漢家此日論詞賦楊馬何當更擅名

寄懷兩兄

帝輦韶光百萬家承恩薄采禁園花無端客夢關

山遶怪底鄉書道路賒  
羈宦此身真似葉思歸千里  
劇如麻慙懃尺素緘  
雙淚極目衡陽鴈影斜

高伯宗徐子與魏順甫宗子相見過同元乘小

集分得春字

朝回繫馬玉河濱  
貫酒邀歡莫厭貧  
九陌風沙燕市客  
千門楊柳漢宮春  
論交轉向愁邊定  
索句都從醉後新  
涼月滿空留笑語  
明朝岐路好誰親

邊警

頻年虜馬聚河源  
入夜烽煙度薊門  
招募已空三輔  
離無復百家村  
邊聲忽下書生淚  
秋氣先銷戍

客魂劔騎翩翩歌出塞  
漢庭諸將又承恩

庚戌秋日紀事二首

八月燕山朔氣高  
胡風吹雪滿征袍  
邊關一夜傳烽火

畿輔千家過繹騷

御殿初聞朝議集

是月上始視朝集羣

臣夫策退虜

還宮誰解

聖心勞

上自西還大內

苑登城忽覩腥

膾氣直似奔騰漲海濤

其二

天威赫赫震離宮  
極目郊關萬室空  
整旅未申司馬

法捷書頻請貳師  
功玉門關險無傳  
檄武庫兵陳已

掛弓

時職方請發武庫兵器而司庫者坐索千金而後發比發則虜得意去矣

自是漢家

饒王氣諸陵依舊朔雲中

家至

亂後村村哭未休南雲北雪總鄉愁家從白骨林邊  
過客似黃龍戍外留細雨寒燈孤館夕西風殘菊五  
陵秋相逢悲喜魂初定呼取樽醪強自酬

賦得雙塔寺

石塔參差御苑西凌空雙鴈識招提梵鈴風起聲相  
激仙掌雲分勢欲齊似引飛鳧朝帝闕豈煩鳴馬  
護禪棲長安落日馳車駟何處逢人路不迷

送梁公實謝病歸南海

潞河新雨動微涼越客歸帆帶夕陽無奈茂陵常臥  
病非關揚子薄爲郎三邊斥堠驚蓬鬢五嶺煙霞護  
草堂岐路未堪論後會斗邊龍氣遠相望

登毘盧閣

香臺縹緲百輪盤燕代山河入倚欄仙梵忽從天上  
落貝經疑在斗邊看晴光隱見千巖碧秋氣蕭森萬  
木丹直北煙塵殊未息何當高枕法雲端

香山最高亭有懷于鱗子與

丹梯百折上青冥檻外諸天散翠屏兩塔煙花迷下  
界千山雪色照空亭金臺北控凌承露寶地西環擁

建甌日暮振衣人不見飄飄僊梵共譙聽

送孫侍御明德按秦中

乘驄使者下幽燕萬里函關玉節懸抗疏已聞匡漢  
策感時應著過秦篇王師六月仍飛檄客路千山此  
別筵西土只今堪涕淚何時入對未央前

舟夜懷子與

今古詞場有代興相看何意獨飛騰扁舟自去浮湘  
水多病常懷臥茂陵秋湛漢宮金掌露月明滄海玉  
壺冰思君不見過吳會天目峯頭誰共登

張良廟

空山遺像儼留侯父老猶傳借漢籌帷幄幾年黃石  
略雲霞千載赤松遊巖前地截彭城險仗外天橫泗  
水流楚漢已非形勝在白雲懷古不勝秋

寄薛思素比部

金陵蟠踞帝王州越客蹉跎賦遠遊萬里風吹江  
浦月五湖煙接敬亭秋謾嗟長劍逢人晚不惜明珠  
向爾投隔歲音書渾未得黃塵赤日總深愁

同元美登蕪城閣得秋字

隋隄高閣俯邗溝載酒歡同賦客遊樹裏鐘聲山寺  
午簷前雨色海門秋離宮花鳥都陳迹輦道風沙自

古丘二十四橋何處是且乘明月醉揚州

瓜洲阻風望金焦山

秣陵東下海天孤入望金焦忽有無高浪欲吞雙底  
柱巨靈常護兩浮圖龍宮日出交相射鷺嶺雲蟠竝  
可呼鐵甕城頭風汛惡那能咫尺御飛鳧

姑蘇懷古

欲上蘇臺望五湖虛傳詞客賦吳都祇今佳麗稱名  
郡終古山川想霸圖風雨胥濤寒自落兔猿娃館夜  
相呼百花洲上被蓑者不問陰晴只釣鱸

虎丘寺同彭孔加王敬美登覽二首

雲巖古刹瞰江流江左名山此最幽五色花分龍作  
樹千僧石踞虎爲丘闔閭舊事馮誰叩風雨深杯款  
自留勝賞何緣逢二妙磨厓好與記同遊

其二

法門西望古蘇臺白石清江一線迴王氣已隨神劍  
化浮雲虛訝錦帆來卽看鹿苑多靈曜不信龍池有  
劫灰竹脯麩牲聊共飽天花無數雨中開

虎丘別孔加敬美

空山蕭瑟雨氤氳清梵遙從天上聞病後登臨憚不  
倦望中吳越渺難分江帆片片浮香霧海樹重重護



法雲此地相逢如幻夢五湖秋色悵離羣

次嘉興卽事

津亭落日繫蘭橈  
李城臨海國遙  
百里魚鹽長水  
市萬家煙雨瑞虹橋  
青樓越女歌相屬  
白紵吳兒舞  
自驕最是江南佳麗地  
可憐機杼日蕭條

八月十八日浙江樓觀潮

浙江樓望浙江潮  
八月長風海若驕  
萬馬蹴濤驚地  
軸千鯨噴沫撼星杓  
天連巨浸疑相盪  
雪捲重山忽  
自消却怪賈帆空際落  
翩如六翮下扶搖

重遊西湖

肩輿露冕出深松  
湖上看山肯厭重  
金碧波間千佛  
刹鬱蒼天外兩高峯  
酒船歌舞縱橫入  
沙磧鳧鷖斷  
續逢縱飲遲迴江  
月落萬家燈火傍  
疎鐘

夜泊星渚有作簡劉汝欽使君

月上匡廬照客舟  
坐憐星石在中流  
倒從水鏡窺河  
漢直擬仙槎犯斗牛  
長孺憂時仍臥閣  
仲宣懷土倦  
登樓秋深掛席滄  
江遠總有明珠何處投

夜遊鳳棲洞

丹梯翠嶽倚雲端  
復磴逶迤瞰碧湍  
聞笛夜深疑鳳  
下放歌天靜起龍蟠  
洞中秉燭霞光爛  
石上寒蘿月

唐詩卷三  
言集卷三  
色寒應是當年避秦處桃花不向武陵看

登黃鶴樓

黃鶴仙人去不回漢濱樓閣迴崔嵬千帆雨色當窗  
過萬里江聲動地來雲夢天低湘女怨洞庭葉下楚  
臣哀當時玉笛今寥落獨有梅花泛客杯

席上奉酬朱宗伯

劍佩從容出帝闈松蘿闌寂詠衡門看花未倦東  
山屐入竹頻移北海樽漢主賜環猶日月楚江高  
枕自乾坤書生豈是忘年友倚席踟躕握手論

舟次赤壁別家兄

北風何意攬征裘無奈浮生寄遠遊江湧亂雲蒸赤  
壁客乘䟽雨過黃州樽前涕淚三湘暮別後音書九  
塞秋我向燕臺望鄉國飛鴻落木使人愁

過順德飲李于鱗郡齋得難字

馬度洛州殺氣殘逢君落日且留歡那臺徙倚黃雲  
過楚客悲歌白雪寒萬里雄心摧說劍千秋傲骨強  
彈冠清樽一解風塵色握手相憐行路難

寄熊元乘

憐君多病歷諸艱漂泊東吳尚未還萬里鄉書離亂  
後百年勲業是非間兵戈豈藉儒臣力歲月能銷壯

士顏金馬陸沈吾已厭幾時同訪麈門山

奉寄二叔明府

傲吏歸來已十年貧家真藉素風傳  
聲名豈在山濤下鏤鑠還當馬  
援先髮短江湖惟業白身藏天地  
獨思玄却憐遊子仍羈宦虛羨林  
中阮氏賢

送熊進士履道赴新會令

楚客之官五嶺遙兵戈滿眼別魂銷  
孤帆曉發湘江雨高閣秋凭越海潮  
同學故人誰鮑叔殊方仙令獨王喬  
何當一洗鯨鯢盡聽汝琴聲徹九霄

東謝茂秦

問君漂泊意何如海內兵戈滯卜居  
鄴下爭傳王粲賦燕關更射魯連書  
不知鬢髮窮來短只怪交遊病後疎  
意氣看君逾玩世王門肯復曳長裾

送屠侍御宗豫赴金陵

漢闕新恩繡斧回海門秋色片帆開  
天高王氣分生渚地迴江流抱鳳臺  
六代煙花行部盡中原烽火按章來  
時平更擬三都賦年少誰如東箭才

余德甫席上餞別子與同茂秦元吳賦得聞字

有客將歸思轉哀乾坤慘澹一街杯  
相逢燕市悲歌侶不減河梁賦別才  
秋色薊城雙劍合月明菖水片

旆來吳中父老驚相慰亂後猶能畫錦回

送蔡憲使子木還任蜀中

西去重歌蜀道難  
薊門樽酒暫留懽  
行邊霜葉巴江暮  
戰後秋雲楚峽寒  
父老向傳司馬檄  
風塵猶滯惠文冠  
逢君欲握明珠贈  
世路還同燕石看

聞吳中寇亂寄訊徐明叔司勳張子培明府

憶君愁病出長安  
盜滿三吳辟地難  
徐孺榻懸風雨過  
張華劍倚斗牛看  
千家痛哭秋聲亂  
百戰縱橫海色寒  
此日寸心應折盡  
何時尺牘慰加餐

送李侍御于翔按雲中

聖主宵衣北顧頻  
簡書親授殿中臣  
胡笳暮咽三城戍  
漢節秋清九塞塵  
行部青驄飛雨雪  
匡時白筆動星辰  
疆場何日銷金甲  
草䟽應知涕滿巾

省中曉直

掖署含香夜未闌  
漢家宮闕慶雲蟠  
日華漸吐雙龍曙  
霜氣高凌五鳳寒  
漫是文章能補袞  
不妨留滯且彈冠  
可憐天上金莖色  
常似相如病後看

送劉子成兵備黔陽

幾載談天碣石宮  
蒼茫擁節向黔中  
金城共識艱危策  
銅柱還標戰伐功  
七澤春深飛彩鷁  
百蠻天盡躍

花驄征旗欲發離歌斷易水寒生萬里風

送田戶曹子仁赴潯陽權稅

共識田郎題柱才新持使節下燕臺落帆春色匡廬  
盡虛閣濤聲江漢來天地戰塵今漸滿東南民力久  
堪哀吾家最近潯陽渚何得扁舟趁爾回

寄上少司馬王公時總戎代郡奏捷

吳越風塵未偃戈 詔平驕虜向金河 主恩急難

推輪重宦跡孤危仗鉞多地險白登開幕府天清紫  
塞入鏡歌漢家將相銘功早終古燕然共不磨

問劉方回病

憐君歸計尚蹉跎日臥文園憶薜蘿白髮西風生枕  
席彩衣南國滯兵戈遂令高興樽前少翻得新詩病  
裏多客舍歲寒愁共劇更堪燕市起悲歌

歲暮懷李于鱗 時守順德

千里思君又歲寒病來真自厭彈冠藏書未遂名山  
去混跡其如末路難臥治白雲生郡閣酣歌明月滿  
長安塵中車馬紛相索那得逢人青眼看

懷梁公實 時在告

黃鳥題詩問友生別來無奈倦遊情經年庾嶺音書  
斷永夜燕山鼓角驚夢裏五雲寒王筍病中雙露渴

金莖采蒲虹澗逢仙去應笑馮唐老漢京

懷宗子相

時在告

爲郎幾月歎歸與淮海維揚一敝廬多病相如思倦  
免二毛潘岳愛閒居江湖極目戎衣滿京國論心酒  
伴疎稍喜巨源能厭世未須重擬絕交書

歲暮示元美

驅馬紅塵歲月遷和歌常在酒壚邊浮名雙眼從人  
過狂態千秋幸汝憐自是吳門飛白練豈應清廟絕  
朱絃憑誰更誚揚生苦持戟歸來更草玄

元日早朝

九陌珂聲夜未央西山春色曉微茫三公進璧星辰  
近天子垂衣日月光雪淨蓬萊生紫氣雲開睥睨  
見青陽何人更擬椒花頌擗管羞稱著作郎

送劉方回武庫還楚

羨爾乘軺歸興濃還如司馬過臨邛邊聲未破樽前  
涕春色殊憐病後容山閣倚雲開下雉江清飛雪捲  
黃龍故園風物爭相媚屈宋千秋何處逢

七夕張肖甫至同諸子邀集旅舍

天轉銀河北極迴星橋露掌竝崔嵬何年漢使乘槎  
去此夕緱山跨鶴來明月萬家機杼恨黃雲四塞鼓

輦哀相憐客路雙愁眼又見秋風桂樹開

徐明叔至自吳

幾年舟楫滯江湖燕市重逢意氣孤一臥風雲寒大澤屢驚麋鹿走姑蘇衣冠亂後心逾薄烽火書來淚欲枯西掖梧桐搖落盡憐君弱羽自哀呼

子相元美過訪

乘興何妨數見過論才天地兩生多漢京消渴無同病燕市狎狂有和歌雙鋏暮雲雄睥睨一樽秋雨散藤蘿酒闌起舞傷心切南北烽煙劇枕戈

秋夕齋居示子相元美

風飄月色蕩平沙萬戶陰森苑樹斜銀漢倒流雙鳳闕彩雲深駐六龍車寒城吹笛秋無奈列署焚香夜不譁爲問誰歌清廟曲忽令飛雪滿天涯

與子相對月得人字

楚客銜杯寄隱淪不辭多病臥風塵孤城白露標莖掌萬里明河倒桂輪寒色遠隨烽燧入物華虛遣鬢毛新關山回首悲搖落此夕猶堪對故人

奉寄明府二叔

京洛當年一掛冠壯心虛向畏途寒歸來松菊杯堪把老去兵戈枕未安三峽暮雲停賦筆九江秋色起

漁竿玄才此日慚無補那得飛書折屐看

子與至同子相元美夜集得看字

自君持節下長安明月常同遠燧看乍喜兵戈仍見  
面豈緣衣食更彈冠青楓落盡乾坤暮白雲歌來海  
嶽寒道路逢人俱慘澹未妨茲夕酒杯寬

送王元治秀才歸吳門

彩筆翩翩江左才清樽落日薊門開風塵是處陵陽  
淚戎馬頻年庾信哀遂擬生涯供五嶽羞將名字動  
三台尊鱸故地今存否悵指南雲歸去來

甌甌洞藁詩集卷三終

甌甌洞藁詩集目錄

卷之四

七言律詩

寄俞仲蔚

哀鄭信陽

予有豫章之謫徐宗二子攜黎惟敬過訪席間

賦得沙字

留別子相

寄別元美

酬徐明叔

別劉方回

寄元美塞上

夜泊天津懷子相

黃河舟中送黎惟敬還

南海

登境山



徐州觀兵

登廬州城樓

宿真慧寺

秋日問范別駕病

登滕王閣

再上滕王閣有懷于鱗

元美子相子與

與友人登東湖樓

同楊啓元大行飲滕王閣

酬宗良王孫

希舜池亭宴集

過同伯別館

鄱陽湖二首

答樹德雪中見懷

豐城道中

臨江郊望

春日凌塗二少參攜酒

邀泛章江

舟泊下惟與莊則勸司

益甫言別

南康城樓

送宋望之侍御還京

登豫章城南寺塔

開先寺作

陶尚書邀遊開先寺

凌虛閣

喜桑侍御雨中登山見

訪

佛手巖

歐陽文學訪予匡山

泊左蠡卽事

暮秋

二日李實夫見過同劉

使君賦

簡劉使君

宿華嚴公館館人曰故華嚴寺也有感作此詩

章城喜余德甫至

登望湖亭

劉使君病後有歸志作此慰之

送王道克給事還京 子與子相自閩中遣使

訊予匡山賦答二章

劉使君病起邀予避暑郡齋

贈姜約甫

題余德甫草堂

落星寺

貢院月夕有作呈徐思

行侍御

校文簡同事諸僚長

題石鐘山

己未元日

元夕武將軍宅翫燈

雪浪閣題羅太史

奉答朱宗伯

劉方回休中見訪

夏日汎舟訪劉方回阻風橫泊洲有作

答同伯

答用晦

答宗子相見訊

至日俞文學虞叅軍見

過對雪

吳侍御惟錫按楚還京

冬日集鄭館

元夕燈宴同周俞二丈

遊太湖龍崖觀

寄劉子成兵憲

桐城遇張文學

初入京夜集李伯承尚

寶宅論詩

吳化卿舍人攜酒過訪

間行訪元美敬美二首

答于鱗見訊

過鄭

酬張考功助甫

助甫儀部攜壺夜過

將赴河南移息報國寺方丈耿在倫侍御高伯

宗龔用卿二比部洪濟卿參軍攜壺出訪經

宿而別

滹沱河

謁子路廟

睢陽懷古

得鄭若庸鄴下信却寄此諷之

立秋日登大梁城樓

訊敬美

哭宗子相四首

雪望

李川甫宅宴集分得西字

暮春同二大夫過李憲使山庄

寧陵出郭訪李憲使于解氏園醉留此作

署中盆荷始花喜而有

張四宅牡丹

七夕

同張肖甫登平臺

秋日貽李給事葉侍御

黃民部張膳部陳大行時俱左遷中州以執事

會大梁爲此詩志感

九日旅舍與肖甫坐談潘文學攜酒箬適至

鄴城懷古

比干墓

除夕

追輓李光祿忠節

夏日卽事志喜

助甫邀泛汝河分得關

字

過麻城留寄耿在倫侍

御

答汝脩則勸

王生作美人圖見遺因贈

初夏同王使君過開元寺

贈吳樞季司理因懷其兄峻伯

蒲城陷後黃亨夫給事方君敬員外俱避亂樵

川各賦一詩訊之 奉訊林中丞汝雨時以

避亂至郡 九日同君敬登西塔寺

閣 林中丞寓館同何侍御

潤夫方員外君敬攜酒過集

聞徐汝寧被謫寄此慰之

初春署中對雪兩兒子持酒爭勸醉而志喜

送王子薦擢大梁憲副

送林給事子順還京 題林子順陽溪別業

與周汝熙文學 送阿端還楚

送阿堂 送姪子懋聲

寄懷子與 喜顧季狂見訪

寄懷謝茂秦 初入京喜順甫使君夜

酌同賦 登叢臺

聞元美為園事佛寄贈

過衛二首

謁甘將軍廟

雨後行經東林

苦雨

同君敬過屏山寺訪謝文度

凌虛閣雨望

余德甫書至却寄

病起登卧治閣望雪

季狂景武夜過郡齋席

上賦得天字

人日

聞季狂已入武夷却寄

將至武夷以詩促季狂併約沈郭二子

冒雨同顧山人遊七臺山道中作

登七臺山絕頂

空明閣夜與季狂坐談

望氣樓醉題贈戚將軍元敬

午日病小愈孫王二別駕見問留集卧治閣

晚過屏山寺

西塔寺避暑

西橋步月

顧季狂沈嘉則至自武

夷夜集齋中用河字

酬方定之叅政

酬范方伯于中見寄

酬余德甫憲副

贈門人田時積東歸

元日登卧治閣

送張叔養侍御應 詔

還京

過水口贈丁司戶庸卿

時攝鹺政

雨中過篔簹山

寄懷子與僉憲

贈王太玉

送王子端茂才應試

寄王太玉二兄弟時伏

闕為先司馬白冤狀

得旨議功

閩闈校卷作

放榜日作

出杉關別諸父老

渡江別德甫用晦

武昌渡江寄懷張助甫

參議兼訂山中見訪之約

贈杜兵憲子睿

重過鄴下訪謝茂秦不

遇作此遺之

贈李子芳

送陸參軍赴南京

奉和少師徐相公請老

述懷詩

送謝文度赴信宜令

大中丞趙元朴席間道故

送方北行兵備上谷

送龔文學下第歸廣陵

寄懷張肖甫參議時自滇南赴西粵

題龍門圖贈劉秀才

集余懋弘溪閣

集徐懋誠山亭

銀山寺

守巡江防三公招飲赤壁亭

潯陽舟中別莊則勸司益甫劉世仰

劉勰中民蘇與潘何益甫盛州

平然武烈三公許翕未整亭

果余燃端山亭

進山亭

歐諸門圖

果余燃端山亭

飢餓洞藁詩集卷之四

武昌吳國倫著

始安張鳴鳳校  
新安方尚贊校

寄俞仲蔚

俞生吳人也工五言古體詩予昔道吳移舟  
訪之不值

一出新詩海內名鶉衣甘老闔閭城往時虛盡乘舟  
興異地長懸倒屣情娃館笙歌春寂寞姑蘇麋鹿晝  
縱橫斗間紫氣遙相望中夜吳刀慘未平

哀鄭信陽

何人揮涕暮雲邊虛向江湖問鄭玄江左衣冠清白

世湖南風雨孝廉船延陵劍失生前許揚子經知死  
後傳一臥泉臺更宿草秋陰無處不堪憐

予有豫章之謫徐宗二子攜黎惟敬過訪席間

賦得沙字

大江西去楚天涯此日孤舟異漢槎  
帝里春光沈雨雪客程秋水上蒹葭  
故人卮酒驚相問一別風塵遠自嗟  
宣室祗今羣從滿未應前席待長沙

留別子相

自得銜杯賦上林誰從車馬問知音  
風塵漸老窮途色去佳相悲異代心  
滄海片帆飛暮雨薊門三月望

秋陰思君畏向淮南過桂樹蕭蕭祗自吟

寄別元美

自爾驅車塞上行天涯卮酒異平生  
卽看一夜風濤色何損千秋日月明  
微祿暫甘彭澤臥短衣應老龐門耕  
扁舟湖上如相訪未必鳴夷是姓名

酬徐明叔

楚客何曾識路難感時羞自泣南冠  
平生杯酒青雲薄此去江湖白日寒  
宦拙非緣明主棄心違常藉故人看  
猶餘萬里南冥在莫向蓬蒿惜羽翰

別劉方回



樽酒他鄉別思偏春陰蕭瑟薊門天江湖淚滿論才  
後風雨魂銷去國前清世未慚漁父問微名翻畏衆  
人憐綈袍猶有君相戀莫使音書隔歲傳

寄元美塞上

王郎別我未銷魂六傳飛揚出薊門鼓角秋聲迴地  
軸佩刀寒色照天關馬肥苜蓿黃金勒客醉葡萄白  
玉樽回首中原風雨過不知揮涕向誰論

夜泊天津懷子相

張翰秋風去不疑桂叢猶滯故人期平蕪日落千帆  
宿大漠天高片月垂潮起魚龍吟北海露寒烏鵲噪

南枝長安未少衣冠地此夕誰論楚客悲

黃河舟中送黎惟敬還南海

握手輕分李郭舟寒濤六月漭生秋風吹華髮乾坤  
短天坼黃河日夜流逐客去應吟澤畔故人歸復臥  
羅浮請看前路兵戈滿杯酒難論此別愁

登境山

登臨何處可忘歸天畔黃河遶翠微落日倒銜危石  
照浮雲低逐亂帆飛山川對酒心仍壯楚漢興亡事  
已非錯擬蘇門舒一嘯不禁秋色灑人衣

徐州觀兵

時趙尚書視師

上將樓船截海行天兵十萬過彭城吳雲晝擁黃金  
甲漢日秋懸白馬盟幕下材官俱慷慨江間羣寇尚  
縱橫無令千載征南使只數銅標馬援名

登廬州城樓

落日登樓感慨生遠山迴合太湖平中原萬事過懷  
土北極孤雲入望京星斗晝寒廬子國烽煙秋滿白  
公城可憐十郡瘡痍地入夜飛書更募兵

宿真慧寺

浦師真境萬峯藏曲逕扶攜到上方山殿斲雲開十  
地澗泉飛雪灑三湘金身不逐風塵改玉鏡平臨日

月光我自征途多病客暫應移榻傍醫王

秋日問范別駕病

千村落日照孤城樹裏高齋雨氣清不少青山堪對  
酒其如滄海更論兵一官漸改憂時鬢萬事俱違臥  
閣情只怪尊鱸思轉切秋風蕭瑟楚江聲

登滕王閣

崔嵬古閣大江頭病起登臨屬暮秋窻際白雲吳楚  
合波間赤日古今流山川不盡孤臣淚歌舞曾聞帝  
子遊萬里烽煙迷北望還如玉槩在荊州  
再上滕王閣有懷于鱗元美子相子與

高閣重登秋欲殘南州風物盡凭欄空江不斷西山影紫氣猶冲北斗寒遷客形容愁對酒故人消息畏彈冠中原未少論心地不定浮雲何處看

與友人登東湖樓

湖上飛樓切絳河登臨無奈旅愁多風塵片地容攜手景物千秋起放歌左蠡寒濤當檻落西山疎雨近人過惟應漢主憐詞賦不遣孤臣到汨羅

同楊啓元大行飲滕王閣

乘興江樓倚夕暉一樽常與世人違雲銜百堞窻中吐浪蹴千帆樹杪飛北斗故懸遷客淚西風欲上使

臣衣浮雲萬態君知否莫怪登臨醉不歸

酬宗良王孫

高館論文星斗迴還如司馬兔園來兵戈王室憂同姓詞賦名山縱異才九月天寒雲夢澤萬楓秋老豫章臺逢君不下思鄉淚屈指中原事事哀

希舜池亭宴集

灼灼芙蓉繫艇深竹欄松逕故陰陰問津疑失桃花水招隱堪同桂樹林石上暝雲留醉臥杖頭殘月起行吟笙歌夜促飛觴急萬里明河倚席沈

過同伯別館

白雲高館寄城闌麗石雕欄瞰水濱竹裏停驂寧問  
主松間舞鶴解迎人著書劉向今誰識作賦相如晚  
見親斗酒未應妨世路西來山色迴嶙峋

鄱陽湖二首

欲向匡廬臥白雲宮亭水色晝氤氳千山日射魚龍  
窟萬里霜寒鴈鷺羣浪擁帆檣天際亂星蟠吳楚鏡  
中分東南歲暮仍鼙鼓莫遣孤舟逐客聞

答樹德雪中見懷

一別章臺朔氣侵盈盈秋水故人心貂裘季子寒仍  
惜統扇班姬遠自吟書到陽春回黍谷興來風雪擬

山陰江行不辨廬峯色欲寄梅花何處尋

豐城道中

春風芳草遍南州病起猶能賦壯遊落日羣山青不  
斷晴雲高樹碧俱流愁干象緯深憑劍故狎江湖遠  
泛舟萬事祇今成浪迹明珠何用暗相投

臨江郊望

西來贛水遶提封古木疎村暝霧重都尉城空愁燕  
雀太平江冷臥魚龍自緣衣食妨歸計甘向風塵老  
病容玉筍僊人今不返好乘明月嘯諸峯  
春日凌塗二少叅攜酒邀泛章江

去國猶逢二大夫誰云遷謫是窮途樓船截浦遊偏  
壯斗酒看春興不孤賦裏青山移日月歌來白雪滿  
江湖灌嬰城上烏棲盡更有輕舸送玉壺

舟泊下雒與莊則勸司益甫言別

下雒城南春草平辭家復作豫章行紅塵敝屣非吾  
計白首綈袍見爾情野樹連雲歸鳥息江風吹雨亂  
山鳴沙頭貫酒深相勸莫使離歌變徵聲

南康城樓

湖上冥冥雨氣殘異鄉風物此樓看簷垂晚照低平  
野帆掛春雲度急湍峯色遠攜遷客醉鴈聲清落九

江寒關山南北俱戎馬何處煙霞穩釣竿

送宋望之侍御還京

颯颯西風彭蠡鳴仙舟落日繫孤城論心轉畏清樽  
盡赴國寧辭白髮生涕淚兵戈千古事狎狂湖海衆  
人情向來寶劍秋虹吐莫使長安避馬行

登豫章城南寺塔

古塔峻嶒萬象蟠西山如鷲捧危欄扶筇漸與彌天  
近引笈新知覺路寬雙樹影迴平野暮百鈴聲徹大  
江寒毫光夜夜凌無極併作南州斗氣看

開先寺作

寺在雙劍峯下梁昭明讀盡臺故址

飛來雙劍卓諸天寶座空王霄漢懸草樹已深梁殿  
閣風雲常護楚山川松梢急峽翻晴雪塔外平林起  
暮煙倚醉登臺偏莫厭大湖春色望中偏

陶尚書邀遊開先寺

自投簪紱下承明樽酒看山鹿馭輕載客遠隨松徑  
入尋僧深叩石門行春衣翠滴諸峯色夕磬清流萬  
壑聲梵殿書臺零落盡君家五柳獨含情

凌虛閣

在天池寺西

岩巖梵閣摩青冥萬壑千巖蟠巨靈塔下微雲蔽三  
楚堦前白石羅羣星蛟龍奮甲去作雨後鳥銜花來

聽經面面芙蓉摘不盡惟應此地堪常醒

喜桑侍御雨中登山見訪

夜宿天池色界寒朝來風雨暗層巒崖間石滑愁藜  
杖樹裏煙重礙籜冠萬壑鐘迎仙客至九江春到法  
門看陶潛不入東林社尚有清樽興未拚

佛手巖

佛手從空覆翠微參差峯色競相輝僧巢石室雲爲  
臥客過巖泉雪滿衣金粟朗披千界出寶花寒墮九  
江飛憑誰莫怪登臨癖一入名山悟息機

歐陽文學訪予匡山

楊瀾東下白雲流此地堪停李郭舟  
鴈後故人南北淚樽前落日古今愁  
十年湖海留長鍊八月風霜上敝裘  
爲問壯心曾似昔肯同司馬醉江州

泊左蠡卽事

左蠡揚瀾一繫舟廬峯九疊障寒流  
魚龍跋浪千帆暮蘆荻迎風夾岸秋  
明月關山懸故國遠天烽火照神州  
沙頭小吏私相慰束帶無須抗督郵

暮秋

九月山城菊未花獨持樽酒傍煙霞  
五峯縹緲匡君宅三逕荒蕪陶令家  
逐客已甘成土木逢人那敢問

京華醉來欲遺傷秋思落日西風起暮笳

二日李實夫見過同劉使君賦

使者重停白玉鞍空齋何以結君歡  
探春不厭深持酒得句相矜倒著冠  
病起滄江南鴈度夢回青瑣北星寒  
論文十載俱霜鬢莫向樽前攬鏡看

簡劉使君

驄馬霜飛海甸寒畫熊天遣到江干  
聲名未減淮陽臥世事何如蜀道難  
不見黃金勞漢使曾同白筆載周官  
城頭萬古廬峯色尚可同君倚醉看  
宿華嚴公館館人曰故華嚴寺也有感作此詩

道傍空館鬱崔嵬，卻是前朝說法臺。  
舍利已隨秋草沒，摩尼曾捧夜珠來。  
爭驅馬首衝疑網，誰向龍池辨劫灰。  
見說村中風雨夕，猶聞金鐸上方回。

章城喜余德甫至

章城雨過百花飛，江上春隨使節歸。  
衰色漸添兵後髮，淚痕猶滿別時衣。  
燕臺舊侶黃金盡，楚地新聲白雪稀。  
攜手便應拚一醉，向來詞客宦情微。

登望湖亭

亭在彭蠡湖中蘇長公題詩其上

湖北湖南春水深，小亭孤嶼水雲侵。  
長天一縱哀時目，芳草偏含去國心。  
波射夕陽千鬢動，雨收平野萬

峯陰人傳學士登高賦，曾似當年澤畔吟。

劉使君病後有歸志作此慰之

五月山城病欲蘇，七閩東望海天孤。  
鏡中華髮愁分虎枕，上秋風擬釣鱸。  
雨過松杉寒不散，江清猿鶴晝相呼。  
稍聞父老爭留寇，那得扁舟遂五湖。

送王道克給事還京

憶昔曾聯供奉班，瑣闈清切五雲間。  
簪毫夜傍金莖直，委佩晨趨御螯還。  
一自風塵捐駿骨，翻從湖海問龍顏。  
君今更入承明謁，補袞何須羨仲山。

子與子相自閩中遣使訊予匡山賦答二章



素書遙自七閩來落日披緘字字哀漸有烽煙侵臥  
閣可能花月傍登臺窮途頗悟盈虛理我輩原非侍  
從才爲語幔亭攜手客清樽須復避人開

其二

信使迢迢問逐臣却令雙淚滿衣巾愁心夜送江流  
急短髮愁懸海色新閉閣久無青瑣夢看山聊與白  
雲親思君一曲匡廬絕何得乘風到七閩

劉使君病起邀予避暑郡齋

桃竹簾欹白葛冠綠沈瓜雪水晶盛已宜疎雨中庭  
霽忽有飛泉入牖寒河朔故人能嗜酒文園病客且

加餐如君一失蒼生望何處東山起謝安

贈姜約甫

一臥淮陽未白頭浮雲忽作廣陵秋扁舟豈爲蓴鱸  
去野服將從鹿豕遊遂有少年娛北海不妨高士重  
南州聞君更就還丹術倘入蓬瀛何處求

題余德甫草堂

萬戶朱樓夾廣衢憐君小築寄城隅坐中山色羣書  
擁枕上江聲四壁虛奇字故人爭載酒席門長者漫  
停車我來竟日墟頭醉風景何曾異敝廬

落星寺

湖上香煙暮不收  
靈宮蕭瑟寄中流  
濤聲觸石千峯震  
雪色兼天萬象愁  
僧舍迴疑浮磬立  
客槎還似渡杯遊  
何人不訝星芒落  
一片珠光御斗牛

貢院月夕有作呈徐思行侍御

棘院陰森章水涯  
銀河天轉月初斜  
雲間彷彿湘靈瑟  
海上迢遙博望槎  
不惜千金收郭隗  
已看雙劍遇張華  
停驄坐攬清秋色  
一夜西風落桂花

校文簡同事諸僚長

江上秋懸鐵柱鳴  
龍光宵燭灌嬰城  
玄珠出海千雲捧  
彩筆陵天萬象爭  
大陸儘容驅上駟  
少年俱欲請

長纓風塵倘慰陵陽泣  
敢愛人間識玉名

登石鐘山

楚客登高秋思濃  
白雲隨杖入芙蓉  
九江落日迷山市  
萬里寒濤響石鐘  
古閣凌空愁過鳥  
輕帆帶雨挾飛龍  
俯看天塹雄南北  
何事中原有戍烽

已未元日

三年元日醉孤城  
此度辛盤旅思驚  
漢吏形容看漸老  
匡山雲物更爲情  
梅花入署春相訊  
柏葉當歌暖自傾  
却憶甘泉題賦後  
江湖翻畏子雲名

元夕武將軍宅翫燈

寂寞高齋日據牀興來猶入冠軍堂共言良夜千金  
擲況有華燈七寶裝月捧鼇山懸綺席星隨火樹撲  
雕梁停歌忽憶長安事太乙祠官在未央

雪浪閣題贈羅太史

百折春江數仞峯巖扉蕭瑟暝雲重濤翻白雪凌孤  
閣石吐玄泉落萬松抱璞荆山寒自照乘桴滄海暮  
誰從如何漢帝中興日尚使人間有臥龍

奉答朱宗伯

谷口移舟勝若耶春樽疑對武陵花十年此別心仍  
醉一夜相思鬢欲華不見安車馳魯邸敢期前席問

長沙從君浮海非無意却恐星辰犯客槎

劉方回郎中見訪

五夜星分闕下班二年秋思滿江關予甘末路從人  
棄汝亦清時謝病還樽酒暫寬書後淚兵戈俱老別  
時顏酣來不作南冠泣促膝高歌月滿山

夏日汎舟訪劉方回阻風橫泊洲有作

百疊青山一水浮興來思共美人遊波搖洲渚天無  
力日薄蒹葭雨欲流長夏已拚河朔酒北風偏滯剡  
溪舟盈盈不比瀟湘隔采采江籬轉自愁

答同伯

別來高枕漢江東未向塵氛泣路窮江上青山橫落  
日雲邊白羽厲秋風明珠未報心仍遠短劍深憑氣  
尚雄若使河清真可俟儘拚身世老萍蓬

答用晦

千里題書見所思乾坤何處覓新知却從南浦銷魂  
後苦憶西山對酒時逐客敢論天下事故人能識郢  
中詞黃塵漸滿江湖日五嶽他年湊未期

答宗子相見訊

去國西從五老游看雲日日醉江州微名不忝稱三  
黜短髮何堪任百憂旅夢月寒宣室夜歸期木落洞

庭秋知君萬里能憐我白鴈來時淚未收

至日俞文學虞參軍見過對雪

只道陽春一線多山齋寂寞奈愁何浮雲遊子踪無  
定故國親知鬢已皤魚美正同張翰去雪殘應待子  
猷過十年斗酒期難數莫惜當筵更放歌

吳侍御惟錫按楚還京

憶自鷓班識令名五陵年少避驄行丹書日擁燕臺  
下白簡霜飛楚甸清畏客久無鸚鵡賦憐君獨作鳳  
凰鳴朝廷豈復須巖穴不盡瀟湘戀闕情

冬日集鄭館

臥雪袁安道未貧談天騶衍術猶新短墻時過東隣  
酒僻巷先回北谷春帳外諸生從識面樽前稚子解  
留賓綈袍贈汝寒仍在白首相看誰故人

元夕燈宴同周俞二丈

何處鼇峯海上蟠故園燈夕且邀歡空堂樹色分春  
早四壁星光入雨寒莫向清樽論宦跡總愁華髮負  
儒冠吳兒最解娛賓意百轉清歌夜未闌

遊太湖龍崖觀

龍山合沓俯瀟湫龍去山空水自流萬壑松風吹絕  
壁一灘沙色明飛樓坐凌空翠春不濕塔入盤渦蟻

屐愁仙洞桃花曾未落漁人虛擬避秦遊

寄劉子成兵憲

時鎮淮揚

萬里黔陽攬轡來海門烽色望崔嵬管關列戟秋虹  
繞幕擁雙戈赤日回風鶴已傳淮水捷鼓鏡真越漢  
人才何時得泛維揚棹醜酒同登戲馬臺

桐城遇張文學

暮雨孤城匹馬來相逢猶似夢初迴可憐綠鬢論交  
意半老青雲獻賦才問俗已非舒子國櫛經好在皖  
公臺知君手自成瑚璉不學荆人抱璞哀

初入京夜集李伯承尚寶宅論詩

憶自華陽款舊盟幾年江海不勝情重來白首寧干  
世尚有清樽可避名別後故人鸚鵡賦夢中今夕鳳  
皇城知音一遇當千古總抱朱絃何處鳴

吳化卿舍人攜酒過訪

西掖梧桐玉露垂十年金馬倦遊時不妨疎嬾從人  
後只怪蹉跎見爾遲草詔雲生鳩鵲觀退朝花隱鳳  
皇池相憐逆旅風塵色日日攜壺問楚辭

間行訪元美敬美二首

時二美以家難棄官寓燕邸

急難辭官漫陸沈間關被髮遠相尋經過自削人間  
跡對語仍寒別後心霜下薊門天黯澹虹垂碣石盡

陰森尊鱸正好歸無計腸斷吳江秋水深

其二

一自浮雲失路岐關山風雨繫離思可憐微服過逢  
地却是南冠對泣時結客黃金虛自擲投人白璧總  
相疑請看落日瀟湘色千古猶含楚賦悲

答于鱗見訊

萬里悲風吹暮笳逐臣猶自傍京華裁書欲寄孤生  
杜謝病曾營五色瓜馬上山明青海月夢中春老赤  
城霞可憐同社諸兄弟只似河橋楊柳花

過鄭

曉歷高原望鄭墟爲耽奇勝屢停車洪堤想像黃圖  
迴廣武間關霸業虛三月流風仍被袂千秋遺愛豈  
刑書中原處處征求急那得孤城獨晏如

酬張考功助甫

匹馬重來叩漢關逢君落日淚潸潸如何七子風雷  
後尚有斯人天地間碣石嶙峋非舊社蓬萊清切自  
仙班題書未與山濤絕二室三花擬共攀

助甫儀部攜壺夜過

旅巷驚聞駐玉珂張華夜逐酒人過黃金消息壺頭  
盡白雪聲名海內多萬戶星辰占遇合九邊風雨入

悲歌瀟湘雜佩堪遺汝一別其如秋思何

將赴河南移息報國寺方丈耿在倫侍御高伯

宗龔用卿二比部洪濟卿叅軍攜壺出訪經

宿而別

停車一借上方棲萬慮都從覺後迷洗藥泉分慈海  
外煮茶煙吐禁城西客攜冰簟依禪榻僧向雲門指  
御題勝蹟玄談俱不偶可堪行色動青驪

滹沱河

滹沱之水鴈門來直入平原遶漢臺萬馬乘流奔赴  
海千鯨觸石鬪鳴雷秦兵北戍投鞭渡楚客南浮擊

楫回麥飯亭前沙草合翠華不見使人哀

謁子路廟

衛侯宗社已丘墟蒲令祠堂非故廬俗朴尚遺三善  
舊庭閒猶似片言餘風吹斷壁龍蛇臥草沒荒臺狐  
兔居弔古百年重灑淚松杉落日倍蕭疎

睢陽懷古

帝輦西巡六馭勞中原萬戶入腥臊胡塵不阻黃河  
險戰血猶懸赤日高力盡睢陽千虎口身輕霄漢一  
鴻毛當時鼓角聲難散斷壘悲風日夜號

得鄭若庸鄴下信却寄此詩諷之

一別風煙悵渺茫書來猶自未還鄉思君落日懸吳  
會久客孤雲倚濁漳賜璧虞卿書更著脫錐毛遂策  
誰長扁舟谷口何年事江水青青橘柚黃

立秋日登大梁城樓

官閣凌空汴水深金飈初動客登臨浮雲易改三川  
色落葉先驚萬里心江上美人遺雜佩城南少婦拭  
清砧繁臺兔苑今禾黍日暮憑欄思不禁

訊敬美

彩雲雙鳳下秋冥苑樹風高翼未寧三世國恩仍  
浩蕩一時家難遂飄零非無黍谷迴春律自是轅門



落大星歸臥東吳年正少愁心江水照青萍

哭宗子相四首

弱冠登朝意氣偏華陽斗酒縱談天從人白眼浮雲  
過去國新詩大海傳尚憶燭龍迴暮景豈應妖鵬識  
流年知君更抱中郎恨萬卷遺書失仲宣

其二

別後裁書涕淚多五年衣食傍兵戈渥注驥裹空燕  
市閩海魚龍妬汨羅把臂往時非汗漫策車千里亦  
蹉跎誰將一曲廣陵散翻入山陽笛裏歌

其三

詞園諸客竝沈淪一日風波萬態新金馬玉珂俱往  
事青門黃土竟斯人誰堪多病馮唐老更少平生鮑  
叔親甕社雙珠今不見却疑淮海失精神

其四

萬里招魂君豈知天風嗚咽楚人詞雲寒洛浦歸任  
昉歲晏濠梁憶惠施雙淚把詩還字字一樽傷往獨  
時時由來腐骨無今昔宿草寧嫌酌墓遲

雪望

雪積中原改物華憑高何處望天涯歸心欲亂章臺  
絮春色先殘兔苑花苦被白雲侵擁褐却疑銀漢入

浮槎梁園萬戶寒煙裏脩竹虛無噪暮鴉

李川父宅宴集分得西字

積雪初晴柳未齊洛橋春望楚雲迷多君虛席夷門  
左與客論文兔苑西千古紅塵銷感慨一樽明月慰  
羈棲年過七十顏如玉何用尋仙入武溪

暮春同二大夫過李憲使山庄

東毫桃花無數開西園結駟行春來沙昏不辨梁王  
苑樹杪忽出闕伯臺落日酒杯任君勸浮雲簿領非  
吾才請看世路悠悠者得醉花前能幾迴

寧陵出郭訪李憲使于解氏園醉留此作

灌木重雲覆古隄柴車野服叩幽棲沙隨市遠雞豚  
足葛伯村荒燕雀迷入戶藤蘿褰翠壁中庭花石引  
丹梯習家風景君能醉誰笑山公獨似泥

署中盆荷始花喜而有述

盆水疎荷亦自芳空齋著雨似林塘葉心珠墮仙人  
掌花際雲銜帝女粧虛訝錦衾遺洛浦欲攜初服問  
瀟湘南薰且作繁華主莫道開樽是異鄉

張四宅牡丹

無數名花秀可餐韶光殊似洛中看誰家競饒千金  
勝戚里虛裝百寶欄遶屋繁香風不斷向人嬌豔日

爭寒醉忘雙鬢隨春老笑摘殘枝戴鷓冠

七夕

大棘天高鴈影斜秋風零落兔園花他鄉七夕聊持  
酒短髮頻年獨憶家乘月佩環飛欲墮隔河機杼望  
猶賒虛傳乞巧人間俗拙宦潘生老自嗟

同張肖甫登平臺

古木平臺汴水涯登臨猶自憶豪華梁王閣道遊龍  
臥魏客夷門列雉斜日落榛蕪秋萬里風飄砧杵暮  
千家逢君是處堪杯酒極北雲山悵望賒

秋日貽李給事葉侍御黃民部張膳部陳大行

時俱左遷中州以執事會大梁為此詩志感

結駟遊梁倦未歸斷鴻遙逐楚雲飛諸君豈合同留  
滯直道從來有是非落月夢懸明主席深秋寒入  
侍臣衣夷門握手殊顏色肯爲窮途淚漫揮

九日旅舍與肖甫坐談潘文學攜酒殺適至

末路逢君亦夢思敝車爲客轉支離塞鴻秋斷中原  
影籬菊寒深故國枝阜帽當筵風自側白衣何處酒  
能持信陵臺畔霜如雪坐遣繁愁入鬢絲

鄴城懷古

城畔清漳間濁漳居人不自感興亡西園月散脩文

社北道煙沈講武場雀去三臺空峙鼎龍爭尺土類  
分香韓陵片石無今古猶抱煙沙擁太行

比干墓

斷碣誰題古大師道傍孤塚自纍纍三宗無力回商  
鼎一諫那能決酒池白霧蒼茫懸首地青天想像剖  
心時桃林牧野俱陳迹行路偏含異代悲

除夕

千門荼壘爲誰新獨夜椒花自愴神潮海弟兄傷往  
事關山兒女憶歸人窮依薄祿堪終歲病與衰容又  
入春欹枕十年青瑣夢只隨雲物度楓宸

追輓李光祿忠節

上黨李文昭公正統己巳以光祿丞死土木之  
難朝有卹典邦人至今祠之其曾孫克善時  
爲開封郡丞雅意表章先烈吳子感而賦焉  
何人諫獵叩彤闈扈從當年事已非萬馬忽乘青海  
戍六師翻困白登圍魂依塞草寒無色血濺胡雲黯  
不飛千載孤忠懸俎豆還如仗節虜廷歸

夏日卽事志喜

平臺搔首視黃河千古豪華一逝波漢闕此時成請  
劍翟家無地可張羅重依日月瞻明盛敢向風雲惜

轅軻試聽中原諸父老鳴弦擊壤自謳歌

助甫邀泛汝河分得關字

客程秋雨換青山一片浮雲去住間新漲初平懸瓠  
水歸鴻猶阻木陵關樽前賦作浮淮去月下舟成訪  
戴還無奈故人能醉我平原十日未應攀

過麻城留寄耿在倫侍御

一別燕山歲屢更素書難寄遠遊情虛從五鹿誇能  
事好是三鱣頌大名日下西陵人咫尺秋歸南浦鴈  
縱橫不知何地堪攜手一夜相思短髮生

答汝脩則勸

天京雷雨蕩妖氛日有徵書下五雲高士漸從巖穴  
起小臣何意姓名聞重揮涕淚驚前事却恐衰遲負  
聖君同學故人頻勸駕到來休勒北山文

王生作美人圖見遺因贈

七尺生綃百美圖含情飛色麗金鋪堂懸楚峽雲難  
散逕指秦臺鳳可呼抱瑟似聞歌竹妓鳴環何處降  
麻姑瀟湘變幻良工手點染鉛華惱病夫

初夏同王使君過開元寺

芝林歇馬叩文殊貝闕陰陰複道紆遶院風燈搖罔  
象半山雲蓋擁浮圖建州城郭千花擁閩海煙沙一

雨驅只訝諸天常不夜摩尼隔水弄明珠

贈吳樞季司理因懷其兄峻伯

吳氏向來稱季子名家況復二難并建州同舍亦奇  
事魯國窮交非世情試吏先憑三尺法散衙常與百  
花盟憐君有夢依池草天日浮雲咫尺生

莆城陷後黃亨夫給事方君敬員外俱避亂樵

川各賦一詩訊之

諸將平南插羽遲故人離亂復何之十年瑣闥無還  
夢一日桑田有變時逆旅形容青鏡惜名山詩句白  
雲知難將往事傷心盡今古浮雲逝若斯

奉訊林中丞汝雨時以避亂至郡

投傳歸棲大海濱掩關猶自畏風塵十年兵火馳諸  
將一日山川幸此身負子欲耕梁父壠逢漁未識武  
陵津稍聞開府新乘勝且復淹留醉故人

九日同君敬登西塔寺閣

西塔峯頭醉倚欄故人佳節劇相歡溪搖白練穿城  
下樹擁丹梯到閣看何處煙雲升海氣幾家砧杵送  
秋寒黃花不減東籬色只愧青門未掛冠

林中丞寓館同何侍御潤夫方員外君敬攜酒

過集

避地移家秋欲闌  
昭陽山水鹿門看  
蠻煙蜃雨身初定  
石室蘭臺夢已寒  
童子放歌將進酒  
故人相慰且加餐  
十年高臥頭仍黑  
未必勲名負釣竿

聞徐汝寧被謫寄此慰之

別後中原夢屢驚  
擔簦何處著虞卿  
兔園白雪蒼茫過  
燕市浮雲慘澹生  
尚有酒杯存故態  
虛將湖海避詩名  
茗溪之水桃花色  
此日能無遠去情

初春署中對雪兩兒子持酒爭勸醉而志喜

雪滿山城海氣孤  
蠻煙千嶺入虛無  
豐年蚤爲三農卜  
濁酒歡憑兩稚呼  
檻竹垂垂分玉筍  
盆梅澹澹浴

冰壺馬鄉虛索梁園賦  
一醉陽春病已蘇

送王子薦擢大梁憲副

攬轡山川亦壯哉  
感時還上信陵臺  
天懸南北星河動  
地引嵩嶠秋色來  
多難正須司馬法  
舊遊誰似長卿才  
洛中諸客如相問  
隨處名山縱酒杯

送林給事子順還京

仙掌高懸北斗間  
卿雲常護紫宸班  
十年瘴海波初定  
八月星槎使正還  
寓直桐陰清左掖  
退朝香氣鬱西山  
知君補袞非凡手  
不必青蒲擬犯顏

題林子順陽溪別業

玉珂朝下承明廬猶問陽溪舊卜居歷亂水雲千樹  
曲蕭疎籬落萬兵餘醉攜海色看馴鳥閒註遺經課  
種魚一室掃除君不屑向來焚草定何如

與周汝熙文學

壬戌夏汝熙歸過大梁予贈之詩有云武夷  
好共尋仙去何得聞江遂解兵今予入閩一  
年兵事稍戢汝熙適訪予至歎曰昔詩豈偶  
然哉又賦詩見貽獎借予治行因作此志感

焉

憶我窮愁入魏年逢君羸馬倦遊燕自從白雪樽前

過常使黃河夢裏懸臥閣此時閩海吏叩門何處武  
夷仙如能挾我餐霞去不必循良世上傳

送阿端還楚

吾兒十歲強論文旅邸相依意獨殷思母夜啼閩海  
月還家秋傍楚關雲舟前落葉千砧送枕上寒江一  
鴈聞聚散亦知從浪迹牽衣不解淚繽紛

送阿堂

七日生兒憶遠離五齡從宦未全癡安危襁褓天相  
命聚散兵戈爾不知漫學裹糧將母去已能懷果爲  
兄私臨岐問我歸何暮一夜秋風鬢欲絲



送姪子懋聲

吾兄千里憐其弟遣汝迎家向故山永夜驚心仍寇  
盜頻年飛夢只江關扁舟一繫兒悲別戰鼓初停婦  
喜還聞道水南新卜舍桃花莫似武夷灣

寄懷子與

故人幽思白雲同只怪新詩病後工看菊展停三逕  
裏採蓴舟泛五湖東尺書迢遞緘秋色斗劍憑陵倚  
暮空我亦倦遊歸未早可能雙翼比晨風

喜顧季狂見訪

海上秋深鴈未回暮雲飛北傍越王臺風生萬里登高

處天遣孤槎泛客來鱷浪有時驚倚劍龍珠無色照  
銜杯吳歌百闕今能否多少愁容待汝開

寄懷謝茂秦

幾年問訊隔漳河南下今如萬里多垂老詩篇猶慷慨  
傍人生計已蹉跎中原不盡孤雲色海上都無一  
鴈過零落舊遊君不見秋風處處起悲歌

初入京喜順甫使君適至夜酌同賦

客散華陽已十年重來五馬竝朝天青雲亦備詞  
人色白首慙稱計吏賢握管春回燕谷裏聞鐘月過  
鳳城邊停杯却憶同遊事何處關山不可憐

登叢臺

邯鄲城北趙王臺入望煙沙萬里迴碧漢  
岌岌還棟宇翠華消息久莓苔可憐東海辭金去  
無復秦庭抱壁來日暮風生千樹裏猶疑歌管送餘哀

聞元美爲園事佛寄贈

王郎中歲欲逃禪嗜酒耽詩癖未蠲成佛豈從靈運  
後息機真在丈人前新營石室藏金粟小引溪流灌  
白蓮便好拂衣尋爾去東林應結遠公緣

過衛二首

塞帷日日是登臨懷古朝歌思不禁郡遠山河開壯

麗隄蟠雲樹入陰森居人指點迴車路過客踟躕擊  
磬音幾日看花春又盡當年綠竹自淇林

江上停驄及暮春銜杯江閣句爭新古來誰問滄浪  
父歌罷偏愁洛浦人芳草如雲牽夢寐征衣幾日解  
風塵盈盈一水勞相訊欲覓桃花何處津

六月謁甘將軍廟

黃龍洲接大江迴捲雪樓高巨浪摧古屋將軍遺像  
在荒村伏臘辦香來何年一破窺吳計異代還憐翊  
漢才有客停舟薦蘭芷檣鳥噪雨若爲哀

雨後行經東林

積雨初收白日低江州策馬遠衝泥瀑流噴雪千巖  
墮雲氣浮天萬壑迷穿逕稍聞呼燕雀隔梁猶自飲  
虹霓重來不辨東林社只逐鐘聲過虎溪

苦雨

予自楚還郡日行雨中入境猶不絕有憂心焉作此

六月南天雨不休七閩瘴氣接神州昆鯨吸浪飛何  
遠石燕沾泥舞自愁潦滂郊原頻問渡雲迷關塞却  
驚秋補天無力慚爲牧多少瘡痍淚未收

同君敬過屏山寺訪謝文度

樵溪西遶郡城斜有客清秋遠泛槎臥閣衷須愁瘴  
癘出郊聊復問煙霞深松避暑月窺相白石翻經天

雨花坐裏塵緣銷欲盡向來何處數恒沙

凌虛閣雨望

風雨樵嵐萬木驚登高一寄遠遊情爐煙自遶祇林  
散雲氣全封列嶂平似有法龍吟大澤忽飛靈鷲出  
孤城上方樓閣虛無裏極目山川變幻生

余德甫書至却寄

歲晏孤飛江上鴻病夫猶臥海雲中風霜不傲初衣  
色兵火常憑尺素通往事徘徊班女扇餘年消息楚  
人弓籃輿若過東林社直指蓮花是遠公

病起登臥治閣望雪

卷四  
言集卷四  
炎方積雪人爭訝病客登樓景亦奇粉堞晝迷千嶂  
影冰花寒結萬林枝倦遊梁苑名甘薄竊臥淮陽鬢  
已綵一送江鄉千里日白雲黃鶴若爲期

季狂景武夜過郡齋席上賦得天字

傲吏長吟百粵天暮雲高竝七臺懸公餘北海時賓  
客病起淮陽又歲年雪意當樽寒欲斂梅花滿署月  
相鮮居然此夜成招隱不比虛回訪戴船

人日

閉閣看梅春事幽彩屏金燕憶中州且拚七日花前  
醉一破三年海上愁淑氣已隨黃鳥至壯顏誰倩白

駒留粉榆社客緘書問何計風塵罷遠遊

聞季狂已入武夷却寄

昔予曾叩武夷君九曲天從一線分洞口黃冠供石  
髓樽前彩筆潤峯紋仙人杖處龍還躍玉女簫時鳳  
不聞此日桃花迷往路可能冲舉躡浮雲

將至武夷以詩促季狂併約沈郭二子

武夷明日是中秋遲爾還攜二客遊薜荔巖懸千古  
月桃花洞入五溪舟仙人委佩青霞落詞客揮毫白  
雪流佳節名山如可負却從何地覓丹丘

冒雨同顧山人遊七臺山道中作

前谿春雨歇鳴橈望裏仙臺混碧霄大峽雲霾千境  
合上方鐘鼓百靈朝肩輿傍險行偏好露冕凌空意  
轉驕石外逢僧君莫笑此中殊勝虎溪橋

登七臺山絕頂

卽劉大師斃身處

天削孤峯插斗傍倒看初日起扶桑山煙忽擁祇林  
樹海氣遙吞舍利光臺按七星分絕景地蟠三郡俯  
南荒真師已跨浮雲去猶有雙龍護法堂

空明閣夜與季狂坐談

高臺風雨極攀躋坐逼青旻萬象低峯似飛來雲未  
掃榻應移傍月同棲昔人面壁非吾事明日磨厓共

汝題呼吸已堪通帝座不知何處唱天雞

望氣樓醉題贈戚將軍元敬

仗鉞新澄瘴海波登樓直欲挽天河晴窻突兀三山  
峙遠樹參差百雉羅帳外風雲行部曲空中鸞鶴引  
笙歌酣來倚劔看牛斗只怪南天紫氣多

午日病小愈孫王二別駕見問留集臥治閣

杜門佳節起偏遲二客相過慰病思采藥名山身未  
健泛蒲高閣景堪移葵榴隔樹迎新暑煙雨平城散  
晚炊敢道政成如渤海兒曹猶繫辟兵絲

晚過屏山寺

唐書詩卷四  
郭外羣峯過雨斜溪南蕭寺晚涼賒慈雲自覆空王  
座福土常開異域花爲愛深松留五馬卻乘明月演  
三車不知何佛傳燈至海嶠俱懸九色霞

西塔寺避暑

石門迴合郡城西岸幘重來路欲迷池浴九龍將雨  
過塔標雙鴈倚天低酒杯無用逃河朔屐齒還如在  
會稽萬壑松濤吹日夜炎蒸那得到禪棲

西橋步月

散步城西第二橋飛虹千尺跨山腰月明烏鵲浮空  
渡風起魚龍拔浪騎圯上逢人疑化石廣陵懷古罷

吹簫野航秋水堪乘興不信河源此夜遙

顧季狂沈嘉則至自武夷夜集齋中用河字

君從九曲泛滄波念我能乘逸興過高館竹陰懸榻  
久七臺雲氣入門多臨邛得客誇能賦郢國逢人屬  
和歌此夜秋風俱萬里莫辭杯酒送明河

酬方定之叅政

十月江州一鴈來書緘雪色遠天開關山字字成搔  
首風雨時時憶舉杯斗入步簷橫作劔雲依望海結  
爲臺無憐寂寞黃金使多病原非漢吏才

酬范方伯于中見寄

南浦題書寄海頭別情羈思兩悠悠天寒霧白蠻王  
壘日落江清帝子樓高曲故從三歎識末交原自一  
言收陳詩若奉明堂采羣牧誰先十二州

酬余德甫憲副

問訊章門淚一收暮雲來往自書郵浦亭卮酒期何  
後郡閣烽煙臥未休歲晏客傳流水曲江深誰並采  
蘭舟從君好結丹霞侶不向瀟湘賦遠遊

贈門人田時積東歸

得客誰先六藝場開函字字挾風霜江峯暮送湘靈  
曲閣夜寒分太乙光莫以下帷高董傳且看題柱屬

田郎東歸雪後溪如駛五兩輕隨海鳥翔

元日登臥治閣

高閣憑城萬井羅朝來春意起關河日南花木三陽  
早天北雲霞五色多懷主尚持椒作頌卜農真負  
麥爲歌欲將鄉思登臨遣海鴈偏隨落照過

送張叔養侍御應詔還京

抗疏歸來日掩關詔書今始及東山兩朝故事  
留簪筆先帝深恩在賜環繡斧重披雙轡下袞衣  
常傍五雲間孤臣潦倒鵷行夢一夜從君萬里還  
過水口贈丁司戶庸卿時攝鹺政

何地逢君不可憐  
客星雙照七閩天  
玉華雲氣詩筒滿  
金瑣江聲署閣縣  
煮海近聞鹽筴議  
徵兵急藉水衡錢  
祇應白首勞王事  
肯向青雲問後先

雨中過篔簹山

寒帷風雨度延津  
絕嶠經過息馬頻  
苔蘚石門蒼自合  
松篁煙壁翠常勻  
猿聲斷續號山鬼  
龍氣虛無過海神  
閩越年來新罷戰  
此中猶有避兵人

寄懷子與僉憲

隔歲音書海上傳  
知君長抱白雲眠  
牀頭雨雪烏程酒  
門外菰蒲菴畫船  
萬事併從身外擲  
一官虛向淚

中遷相思未老頭  
俱白安得浮家共暮年

贈王太玉

有客尋仙海上回  
丹成遺我玉華杯  
青牛未叱函關去  
白鶴應從緱嶺來  
豈信瓊書占伏骨  
虛傳瑤草化凡胎  
八公不是淮南侶  
五嶽真圖何處開

送王子端茂才應試

比年天府計賢能  
聖主新調六御興  
才力何人堪八斗  
文心須汝悟三乘  
國恩自許長纓報  
家夢還占匹練升  
臺上黃金懸市駿  
霜蹄遙蹴五雲騰

寄王大玉二兄弟時伏闕為先司馬白冤狀



得旨議功

有客傳書自海門知君披髮叩天闈關山遍染秦廷  
血日月重招楚水魂石奮豈須同父難倉公虛復負  
君恩無煩塚作祁連象漢使中牢禮更尊

閩闈校卷作

棘院藜光徹曙明桂宮秋色海天清函書競奏三千  
牘比玉誰連十五城不忝昏臣能薦士肯令毛遂晚  
知名周家典禮賓興重此日岐山又鳳鳴

放榜日作

誰云炎服異神州一日諸生國士收五色雲關天府

曙雙龍劔掣海宮秋登名只藉中臺使奏計還趨列  
郡侯縱使王褒能作頌漢家經術敢同流

出杉關別諸父老

閩關五馬玉珂鳴萬里嚴寒又北征日月重扶新  
帝輦江湖猶策舊臣名翻慚父老當車意不盡風煙  
臥閣情回首青山俱戀別行雲無數遶前旌

渡江別德甫用晦

豫章西望楚雲寒欲別重歌道路難三日故人酣未  
足百年羈旅病初寬已堪白社同高枕獨少青門一  
掛冠波上西山流不去故牽行色繞江干

武昌渡江寄懷張助甫參議兼訂山中見訪之

約

赤壁開樽一破愁  
遠天相憶又三秋  
題書鴈領風霜色  
倚棹江兼日月流  
鸚鵡何曾驕楚賦  
虹蜺常自攬吳鉤  
明年春水平如雪  
不信門無訪戴舟

贈杜兵憲子睿

使節遙從北海回  
軍符直向大江開  
投醪百壘舟師合  
草檄千金幕士來  
蓁莽重披黃歇壘  
烽煙漸遠鄂王臺  
過逢舊識清狂客  
欲引瀟湘泛酒杯

重過鄴下訪謝茂秦不遇作此遺之

三年再涉漳河水  
問訊西遊客未還  
諸子向人間戰伐  
老妻垂死說關山  
悲風鴈塞寒相弔  
勝跡龍門遠自攀  
吾意亦將名姓變  
招遊好在五湖間

贈李子芳

肘後羣書只浪評  
誰操鴻術佐長生  
逢君自昔煙霞足  
別我何年羽翼輕  
視背曾知龍叔病  
折肱無媿越人名  
丹砂九轉如堪就  
那得人間老尚平

送陸參軍赴南京

喜識雲間陸士龍  
君家太史故儒宗  
誰誇白面銅鞮胤  
不忝丹書鼎甲封  
三浦樓船天上落  
兩都詞筆斗

邊逢蘭臺夜靜江聲入只憶風吹長樂鍾

奉和少師徐相公請老述懷詩

懷土非無白苧情抗章猶負赤松盟乾坤再闢雙龍  
闕日月常瞻五鳳旌況是先朝銜顧命豈應元老  
厭承明天書亟下尊師禮淑氣朝來滿禁城

送謝文度赴信宜令

海上論文調已孤天風六翮困南圖逢人未薦三都  
賦垂老新懸百里符到邑珠光搖合浦看山雲氣入  
蒼梧蜚芻轉戰今逾急多少瘡痍待汝蘇

大中丞趙元朴席間道故

抗疏先朝萬死輕東山歸去白雲驚十年高枕看  
浮世一日安車起盛名南國尚思驄馬步中臺已叱  
絳騶行淮陽風雨燕山月樽酒憐人短髮生

送方兆行兵備上谷

兆行平南越有功未錄調  
今官

鴈門西去朔雲馳萬壘烽煙六月師聞道單于窺上  
谷不知方叔領邊陲橫戈已壯吞胡氣按轡新成出  
塞詞莫向銅標嗟往事燕然人是勒功時

送龔文學下第歸廣陵

千金何處買龍駒萬里霜蹄却後驅且向雲林開小  
隱不妨經術老名儒清秋佩結淮南桂永夜燈懸甌

社珠傾蓋得君君又別燕山風雨為踟躕

寄懷張肖甫參議時自滇南赴西粵

中原遷客一時收不道還同萬里流金馬已聞歸漢使青門何意老秦侯十年兵火居難卜一字關山淚未休望望蒼梧南紀盡白雲先入故人愁

題龍門圖贈劉秀才

龍門日射扶桑標鱗穴濤驚坤軸搖遂有六螭駕宮闕忽飛一鯉昂雲霄紫髯如戟海神助朱翼垂天風力驕擾龍故是君家事赤手攀鱗翊聖朝

集徐懋弘溪閣

喬木參差擁石林旋開亭榭水雲心檻邊溪長三湘碧屋裏峯蟠五嶽陰舟泊未闌王子興酒酣猶發伴宣吟移樽更待寒山月愛客惟應此夜深

集徐懋誠山亭

杖藜隨處躡芙蓉得入名園興自濃谷口分泉為九曲舍傍穿逕著三峯留歡夜奏魚龍引散步閒隨鹿豕蹤只擬蘇門舒一嘯萬山雲氣漭相從

銀山寺

黃姑山頭白霧升鐵壁古寺羅荒藤居人已測金銀氣法界猶懸日月燈聊倚孤松為結社不須三竺更

逢僧西風萬壑傳鐘磬立馬歸途思不勝

守巡江防三公招飲赤壁亭

山城日落水煙昏檻外驚濤萬馬奔攬勝何年呼赤壁按圖無處覓烏村虛傳孺子能分鼎不博君侯一泛樽風起欲乘樊口渡蛟龍作意吼江關

潯陽舟中別莊則勸司益甫劉世仰

楚客扁舟萬里行大江風雨若爲情隋珠未變投時色卞玉猶全別後名三宿潯陽仍問酒十年溟海正論兵琵琶似解窮交意夜向鄰船作苦聲

潯陽江邊有琵琶亭

甌甌洞藁詩集卷四終

